

譯林說小叢書
編第十二七

歷史小說

恨綺愁羅記

上海商務印書館發行

洋裝一冊定價五角

唯 一 無 二 之 奇 年 二 宮 清 內 容

記爲前清駐法公使裕庚君之女德璘女士所撰，女士入宮侍慈禧太后一二年，故知宮闈事甚詳。慈禧於近年國事之係，可謂重要，書中所記，凡庚子後變法之真相、外交之實情，與夫德宗末年之幽廢端肅諸人之被誅，戊戌之政變，庚子之拳亂，其實際爲外間所不能知者，均時時由慈禧口內流露而出。至於慈禧私蓄之美富、性情之乖僻、政見之卑陋、游嬉之荒縱，又如宮中禮俗之奇異、服色之奢誕、宮眷之童駢、閨宦之險毒，皆爲吾輩腦筋萬想所不到者。女士身歷目覩，一一記載無遺，則此書實合政治小說、歷史小說、神怪小說而兼之，可謂無上美矣。秦

恨綺愁羅記卷上

英國科南達利著

閩縣林 紹
仁和魏 易 同譯

第一章

今余書中所記之廈屋。凡門戶軒窗。均爲十七世紀巴黎城中普通之規制。屋旣高壯。窗皆以木格爲之。門上鑄徽章。更有一鐵桿突出。中懸一木雕棉花。作一巨裏形。街中鄰毗。均作尖頂。上刺空際。地屬聖馬丁街。人聲及輪蹄之聲。長日相屬於道。臨窗陳列者。均西班牙所製。溫厚之軟榻。坐而臨下。道上行人。厯厯皆見。此日樓中。有兩人坐憩。一男一女也。顧皆以背就窗。以面內嚮。屋中粧點燦爛可觀。此二人。彼此注視。心中滋樂。似其外更無可樂者。女年剛及二十。白皙而柔膩。鮮潔無倫。在閨秀中。可云一塵不染者。五官溫媚。可以醉人。髮黑而眉青。適與玉雪之容相襯。交呈其麗。淡而不穠。衣尋常黑衣。釧以黑珊瑚爲之。名曰雅德爾嘉。鐵納爲有名新教中布。

商之女。左側之少年。則衣華美之服。年齋較女長。可十歲。氣概凜凜。黑鬚極修。整眼晴黑。而作光。當其威稜所發。足以號令羣人。迨露其和婉之容。則又能使婦人媚悅。衣蔚藍之戎服。徽章爛然於胸。金絡滿之肩章。亦明燦照眼。革韁光可鑑。人跟後之釘。以金爲之案。上陳銀鞶之刀。則此少年所御者。但觀其武容。即知爲魯意十四羽林之宿衛。且舉其周身服飾。言之尤知爲羽林中之魁傑。前此亦曾有戰功。故亞摩雷德嘉鐵納之名。在羣少年中。爲翹出之男子。在在令人生慕。此二人本同姓也。德嘉鐵納一姓。本爲信教之故家。少遭憚凶。故出而從軍。至於今日。皆自平地拔起。無一人爲之引援者。父之族弟。以出奉新教與國教忤。乃不能仕之朝廷。因去其姓。上一德字。舍貴族而就平民。服商於巴黎之中。業亦大昌。巴黎城中。推爲富室。羽林少年所坐處。即其族父之樓居也。同坐之美人。卽其族父之女也。外國同姓爲異此原有之不足爲異。此往往曰。汝額上皺紋。安能欺我。女曰。我本無是。但句亞摩雷曰。言但何者。女曰。汝不云今

書所有非我臆造觀者諒之

日行耶。亞摩雷曰。我以明日歸女曰。汝必欲行耶。少年曰。身爲皇家服役。明日當入衛內庭。迨早禱一畢。則大尉白利沙受代。我立歸矣。女曰。亞摩雷汝恆與我述天潢之女。令人往往生駭。亞摩雷曰。何駭之有。女曰。爾身處繁華之區。胡乃降尊入諸布賈之家。亞摩雷曰。布商家乃有天人女。曰。以此之故。尤不能不異。爾長日在繁富之區。所接不無佳麗。何爲在一庸庸無見之女郎家。此甯不尤異耶。亞摩雷曰。凡人之見地。不能强同。天下之人。自擇配。如賞名花。賞其豔麗而已。若我者。則注意一百合花。不居沙砲之上。間生蒼蘚之中。而光豔射人。可以醉人心目。然吾語後爾之額紋。胡爲尙爾。又何以故。女曰。吾甚願吾父早歸也。亞摩雷曰。族父不在。苦寂乎。女笑曰。非也。老子出行。吾心滋憂。外間傳聞威逼新教之人。甚酷烈。吾防吾父陷入科網中耳。亞摩雷曰。老人多智。必能自全其身。女曰。吾父方造布業公所。將議與政府人相抵制。不令其以兵臨刦。亞摩雷曰。胡有是事。我乃無聞。女起立曰。有之。因取一藍色之紙。上加璽書。亞摩雷見牋。愕然牋上書曰。諭聖馬丹街布商地烏斐爾嘉鐵納本。

司令將以騎兵二十人長駐爾家。凡供億悉爾備之。時之修短。本司當更有諭。其下署曰。民政大臣德葆百爾印。亞摩雷知法京方。以全力倡新教之人。顧自問方居通顯。乃不能庇其同宗。遂立抵其諭於地上。言曰。騎士以何時蒞。女曰。父言以今日晚中至。亞摩雷曰。然則爲時迅矣。明日吾退值時。面取王旨。收回成命。噫。今日斜陽已入。吾不能更濡滯於此。女曰。行乎。亞摩雷曰。吾意本待老人歸時。以汝屬之不爾。騎士一來。吾防爾爲之凌暴。顧吾今夕若不至。非色野離宮宿衛。則爲罪非鮮。汝不觀門外蹄聲誰耶。彼戎服或老人使之。將書耳。女臨窗而觀。言曰。此人從美國來。吾父言。今日必至吾家。亞摩雷亦倚窗外盼。心中滋以爲異。顧此門外騎者。亦健碩。一年引首仰望。樓窗似有所疑。騎士冠氈冠。爲巴黎人所不習見。長靴及外衣。頗不見異。惟氈冠則市人爭凝注其人。騎客佩長箋之槍。鞍上有巨囊。騎客即坐其上。馬亦神駿非凡。服上露泥。項上帶汗。馬似微困。到門曲其一足。左右互易。以蘇其瘡。騎客旣得所居。則下馬叩關。亞摩雷曰。客似來從坎拿大。然則吾亦可名爲坎拿大人。今

彼新世界人蕃衍亦不後於我老世界。或吾能識之。以彼間白人寡。吾居兵間二年。必能辨認。女曰。君或未辨其人。其人自英國殖民地遷居坎拿大者。彼能法語。彼母亦法人耳。亞摩雷曰。彼何名。女曰。似名亞摩須格林。彼翁與吾翁同賈於外久。今其人爲父所命至文明國中。增其閱歷。忽聞樓下有異聲。發女驚曰。此何聲。但聞呼者尙未已。卽有趣步之聲。內奔亞摩雷往至梯次。俯觀亦爲聳然。但見兩女傭顫聲而號。有蒼頭曰斐爾。似負痛揚其腕。見一巨獸。伏其足下。獸紅眼而白牙。此時騎士出而調馬。聞聲奔入。力捉此獸。叩其鼻。倒納之囊中。語蒼頭曰。此吾家畜之熊。無傷也。其操法語。乃與巴黎人無少殊異。斐爾拭其額汗。曰。天乎。此一震直增我五年老態。吾方與此少年先生言。而後跟竟爲所較。騎士曰。此吾過也。吾忘束其囊。乃令此物逸出。幸爲小熊。生甫五禮拜也。足下曾否爲吾父契嘉鐵納先生。亞摩雷即在樓上應曰。非也。吾族父方外出。吾爲羽林大尉德嘉鐵納。此女郎爲嘉鐵納。卽足下之小居停也。騎客卽登樓。與二人起居。狀甚疏野。復至門外。引其馬。少須歸退閒之室。手

中將一狐皮。向雅德爾曰。女公子。此熊賚送老丈。此皮。則奉女公子。物固微也。或可用爲拖履及手圈以禦寒。雅德爾手撫此狐裘。甚溫暖。乃曰。此何獸之皮。來自何嚮。客曰。是名玄狐。去年僕在阿尼達湖上。槍得者雅德爾。引皮熨之。玉容之上。白黑相襯。玉雪之容。乃愈顯露。言曰。惜老父乃不在家。吾迎客之心。乃一如吾父君之臥處。卽在樓中。斐爾蒼頭。可以引君入居。客曰。何名臥處。此又何用。女笑曰。此爲夜息之所。客曰。息乃以樓中耶。亞摩雷笑曰。客若不樓居。請聽客。客聞言。卽臨窗言曰。彼間有樺樹。吾卽以衾枕移諸樹下。較樓中爲佳。冬間屋居便也。若夏中殊鬱鬱。不自聊。亞摩雷曰。然則足下嚮不居城市矣。客曰。吾翁居紐約。與彼得司蒂芬森爲毗鄰。僕則不樂城居。直居叢樹之中。女曰。果客何嚮。吾翁必允。但圖客之安逸。卽已。客曰。謝女公子。吾今卽以衾枕近此樹。吾往調馬矣。女曰。此事胡不令斐爾代之。客曰。茲事不能屬人。當自行。亞摩雷曰。客若自行調馬者。我願同行。且有告語。因與女別。女曰。明日當再相見。於是兩少年同下。至於院中。亞摩雷曰。罷乎。客曰。我焉解罷。亞摩雷。

曰客既弗罷請伴此女郎待其父歸客曰何謂也亞摩雷曰我適有公事此女郎須人保護客無言去其外衣爲馬去泥垢及汗

第二章

明日侵晨王宮鐘可八點王起而輦道中衛士森列如林寢宮外司官皆相對微語以王之晨起似爲宮中之大事內侍奉盥湯氣蒸騰其人則御前蘿髮匠曰聖坤丹尙有內侍捲袖摩肩在皇宮之左廂備驅使衛士執棒端立亞摩雷爲羽林領袖與其同官方調笑於輦道之次此時亦躡步及於寢宮剛及宮門門微啟一人出以四指駢於脣際微語曰弗聲王尙寢也內侍一宣衛士卽彼此附耳傳此四字其傳語之人曰彭登爲值夜宮之人語後引亞摩雷至一深闕之地言曰德嘉鐵納大尉晨興無恙亞摩雷亦曰彭登無恙王宵來安否彭登曰佳亞摩雷曰在時宜起彭登曰未也尙有七分半鐘王起矣今日問大尉守寢宮大門者爲誰亞摩雷曰少佐白里沙彭登曰汝在值尙有幾時亞摩雷曰尙四旬鐘彭登曰昨日陛下命我告在值衛

士德微翁早朝者屏去之今請爾傳旨示白里沙亞摩雷曰可彭登曰果王所新寵之女人其名汝當知之亞摩雷曰得母爲馬丹曼忒農彭登曰然勿宣其名可也彼苟有私書汝伺王間因而進王亞摩雷曰諾彭登曰尙有一女卽前此侍王者亞摩雷曰得母爲馬丹孟忒斯班彭登笑曰武人口快可哂也果彼來者當以柔道郤之勿聽入亞摩雷曰可彭登曰此僅三分鐘矣於是遂進輦道衍衍然行彭登者固內侍然侍王久凡朝貴皆退避其人輦道衛士如林衣服肩章均鮮美無倫彭登忽高聲宣御鑪有人稱曰已備一人捧琖瑯巨盤中疊細木之皮以待舉火彭登又曰開窗者安在復有人曰諾又曰司宮蠟者又安在復有人曰諾彭登曰汝輩候旨宮門遂入宮爲四方式有高窗以細絨爲幔幔罅微有陽光射入入銳而光立散照見紅錦璧衣矣鑪次有御座鑪簷以亞刺伯美術雕鐫及於屋頂屋隅有小榻則彭登值宿處也中列御牀四垂以錦帳皆花繡牀之四圍皆金闌干鮮明照眼闌干去牀可五英尺牀前陳小圓几几上陳銀盤及琖瑯小杯杯中以水和酒盤中則疊雞胸細

肉三片備王醒時御食彭登入時以履踐厚氍毹細軟無聲靜中微聞王之呼吸既入闌干執表待時恭侍王起王衾褥以東方綠錦爲之枕以花繡之御枕王短髮高鼻在素錦帳中隱約可見時至彭登藏表鞠躬微語曰啟陛下已八點有半矣王懵騰啟其棕色之眼言曰時屆耶手中爲十字架即其記念之物以吻親之遂坐而辨物作乍醒狀言曰彭登已宣吾旨與羽林否彭登曰啟陛下微臣已宣勅矣王曰值者爲誰彭登曰司門者爲少佐白里沙司輦道者爲大尉德嘉鐵納王曰德嘉鐵納得母爲朕在風丹白露馬蹶時此少年爲朕引轡者耶朕尙憶其人汝今令彼人入侍彭登即啟御扉司爐司窗諸人咸以緋衣微步俯首而入中有一人卽移去彭登小榻入他室尤有一人去其几上酒肉並其燭奴第三人則盡掀絨幔令人陽光迨爐火已紅此五人蟬聯而出後朝貴已入前行爲一少年可二十許頗胖碩貌豐而俗衣杏黃絨衣胸飾則以銀絲爲練懸聖魯意寶星同行者年鬚已在四十以外衣素而材貴則黑繻所爲袖領咸以金緣貌頗端肅武毅二人面王時狀與王同觀者

知與王同血脉者也四十者爲王季弟少年則東宮也三人皆鷹鼻卽爲包本天潢中產王弟之貌雖與王同然實有天澤之辨王年四十有六黑髮微禿鬢頗星星而尚有少年風致以身居天位頗復嚴重二目耿耿作光五官位置楚楚爲雕刻家所嗜好者眉作臥蠶脣祕不宣似大權在握王弟則微露恭順之容太子尙盛年初無知覺此二人後續續有大臣至而早朝大臣中有尙衣者尙寶者惟梅恩公爵年事甚少美貌嫣然衣黑絨之衣左股微蹙與之引手同入者則其稟弟土魯司子爵此二人蓋王與馬丹孟忒斯班私產之兒繼進者爲御醫法貢瘡醫長忒里爾凡此等人能作晨班入侍則爲法國中至貴無尙者也彭登以酒精傾入王掌請擦卽以銀盤承其瀝王盥手已略與王及諸人微點其首此時尙未御衣跣足而坐似此嬌媚之容亦惟王始克當之是蓋法國之主人苟遇微風者即可致王於病時薙髮官以紫衣蒙王肩彭登爲王結轔進以輭拖履又爲王加外衣王則卽御榻坐忽顰蹙曰適有何臭適類花露汝輩知我不悅是物孰將入者於是羣臣四顧咸戰慄彭登則

逐人而喚。啟曰芬臭出自土魯司子爵之衣童子大驚卽自陳曰或侍兒格拉孟失檢錯加臣身臣萬死乃觸天怒王曰趣去此衣朕鼻觀爲塞矣彭登趣開窗已而曰止矣復曰聖坤丹今日非朕薙鬚時耶聖坤丹曰謹侍陛下王曰遲三分鐘矣汝胡不將事彭登汝告儀司備早朝今日王似弗樂流目四盼然聖坤丹方薙鬚王亦不能媿罵聖坤丹旣以胰皂拭王鬚則下刀如風尙衣者即以御衣就火取煖待王易着時又有人去王拖履以金鑽爲鈕之御履進王外衣之上有小藍纏緩繫聖靈寶星及聖魯意寶星人苟未面宮庭觀此尋常之一人而列侍乃如鼠之伺貓良不可解矣如是者可半句鐘此半句鐘中早朝者至夥均衛士傳名出入續續不止每人入朝見王輒鞠躬或言天氣或述公事略陳卽已而朝者愈衆迨王御膳甫竟而寢宮中人幾塞屋其與王最邇者則首相羅武乙與將軍二人論武備改良事其一人爲大將偉碩無倫其一則卑瑣然以章服言之尙爲元戎此即康德親王也其旁有白髮教會中人則爲拉歇司神甫卽爲王受洗之國師方與米歐主教波素論異

教之非正時門次有王所心賞之詩家曰拉信波乙路美術家曼沙方微作雅謔惟此等人之在王前可以自由王亦力加寬假波乙路語二人曰以狀觀之王今日甚快快似夜中失眠也拉信曰斯人性質日變不易與言吾今日下午三句鐘將至馬丹愛忒農問狀不審王對馬丹有笑容乎曼沙曰汝詩亦王所喜詎王見馬丹乃勝若詩耶拉信曰焉能以馬丹擬我馬丹機變絕人剛而能斷滋可欽佩曼沙曰汝言彼佳顧有一事正患其多逾常人也拉信曰何也曼沙曰年耳拉信曰此何患人見之第如三十許人二妙目及其玉臂何如者即此老翁亦豈妙年蓋男子之年又當別論波乙路曰男子年高固不驚人若女子者令人生悔拉信曰少年男子尚色中年人則尙甘言故女子年逾四十者恃口而不恃容若在四十以下舍容無以動人曼沙曰僉壬哉詎四十五歲善於詞令者較之三十九之美人愈耶爾今固助曼忒農者彼既得寵焉忘汝者波乙路曰拉信誤矣拉信曰姑俟之波乙路曰設竟誤者如何能母貽害於已拉信曰何害之云波乙路曰馬丹孟忒斯班恨人也焉能舍汝

勿念拉信曰以我卜之馬丹孟忒斯班秋扇斷無更勞之日波乙路曰爾勿自信之堅馬丹曼忒農一入王宮衆咸言後此馬丹孟忒斯班已矣顧王宵來尙與馬丹坐談至二句鐘之久前此能繫王心今卽老大獨無餘韻耶拉信曰此何足據馬丹曼忒農非偷婦不能據略彼蓋含明而不洩耳波乙路曰拉信汝焉知王者試思曼忒農者長日披聖經治女紅益以遲暮之年詎王舍其後宮佳麗而鍾此垂萎之名花耶以我卜之專房者必孟忒斯班卽有他眷亦必青春少婦決不垂青此嫗拉信曰波乙路聽之我終以爲孟忒斯班寵眷必衰汝亦聞消息乎波乙路曰未也拉信曰孟忒斯班之兄弟德微翁今日絕屬籍矣波乙路曰安有是者拉信曰確哉波乙路曰汝從何處得茲消息拉信曰我從羽林騎將德嘉鐵納聞之彼奉勅告禁門守禁納其人波乙路曰王爲此寡情耶宜今日有不豫之色然馬丹孟忒斯班殊有權謀進之可也遠之乃大非易忽曰來者何人乃大有風塵之色王見之矣汝不覘首相羅武乙招手使登耶吾決其人必爲邊將其人長瘦而銳鼻眼小而神完至於朝紳

間乃大類獵鷹。入於鸚鵡之羣。衣服樸素。以王新寵。曼忒農。曼忒農雅素。故王亦雅素。朝士盡化。至於邊將亦然。蓋此人腰下剛刀。非同朝紳之但飾美觀。固已身經百戰矣。立於王前。四盼侍臣。岸然有不屑狀。旣見羅武乙招手。則直至王前。以肘四加擁立之。員氣概凜凜而進王。一見卽謂首相曰風忒納克子爵。朕不見可數年矣。首相曰如王旨。此人曾任坎拿大鎮帥子爵。與王鞠躬伏而嗅王之手。王曰朕晤將軍於心殊適。但願坎拿大嚴冷中人不負將軍之熱血。子爵曰唯死或冷及臣心。王曰朕願此一顆丹心。永永不壞爲朕保全之爾。在邊爲朕保全領土。可云勞瘁。今日勅卿歸朝。意亦願聞邊事。邇來百姓信教者如何。子爵曰尙能動其信心。即彼間傳教者。亦不遺其餘力。唯教會中人往往舍其業尙干與濁世。莫須有事爲可嗤也。王卽謂牧師曰神甫亦聞是言乎。神甫曰陛下聽臣濁世事正有涉於靈魂。亦不能不加干涉。子爵不悅曰陛下適神甫言殊當。惟陛下旣以大權授臣。殊不樂人干涉匪惟教會。卽非教會者亦殊弗憚。王怒曰已矣。朕適所問。亦問信教者如何耳。子爵曰吾

王領土中無一處無牧師。組幽鑿險無不至者。神甫曰。陛下須知教徒傳教。傳其至理。至亦有喪其性命者。子爵曰。然。陛下所遣之武臣。咸遜其勇。往臣常見教徒傳教歸時。或斷其指。或盲其目。均爲野人。斷而利之。歸時養可。經月則復行。而傳教王曰。爾兵權在握。胡聽野人戕害教士。子爵曰。臣所以屢請大兵。王曰。吾亦累遣戎帥。汝不知耶。子爵曰。但有一聯隊耳。地曠而兵力單。不適用也。王曰。坎拿大獨無僑民。足以練爲巡社耶。上帝所遣之使者。乃敢肆其兇。鋒向者固以汝爲大將能靖邊氛耳。子爵不悅。尙欲抗辯。脣動而止。言曰。陛下得毋疑臣不任戰耶。但召取臣舊部。問臣。曾在色乃非。莫而好生沙而土拔克。大小數十戰。曾否爲法國盡其死力。王曰。爾之舊勳朕焉弗省。子爵曰。正惟臣知兵。故知非重兵不足以平邊亂。其地旣博於法國。全境大樹參天。野人伏處樹間。以毒弩相加。此等人雖不審步伐。然其趨捷如風。我軍行一里。之遙。彼行已三里矣。卽欲犁庭掃蕩。然懸軍深入。但有團焦數處草地。數頃卽焚。而燼之。而我軍已勞倦矣。至於退軍之危。乃險至萬狀。狃伏林莽。軍行少。

不整而此少數之人且立燼息息狼顧陛下生而能軍試間以不練之兵與野蠻角爲勢易耶王曰然適朕言亦太率易今與廷臣會議必先籌此邊備子爵曰陛下果念邊臣臣死且不朽且令坎拿大僑民聞之當益生其欣忭不忘朝廷王曰汝亦勿太奢望朕終年中爲坎拿大籌邊爲費巨矣今歐洲多難在在需兵朕何能遠囑及此子爵曰大王惟未親蒞坎拿大以爲甌脫耳試問在歐洲獲勝得地幾何即大勝亦特一二城池若在彼間獲勝凡飛芻挽粟籌備兵械輜重咸不及歐洲百分之一而所得者乃曠莽無窮豈區區一城一池已耶嗟夫大王彼間地腴沃至不可言似此河山及其林木他處焉有如是壯觀但一伸手之勞卽爲我有何憚兵力且無人與我爲難彼間主人翁特零星部落此外尙有英人業漁墾地而已他無人也大王但留意彼間不數年中即可連名都於闊白克彼間北起寒帶南暨熱帶墨西哥海灣東西跨兩大洋非法國有耶主法國而兼有領土者誰非魯意耶王聞言精神勃發僂而聽之子爵語已王以背就榻言曰將軍適爾所言亦效紅人之啁啾耳所謂

英人僑民非新教之徒耶。子爵曰：然。北部尤多。王曰：此何可者。苟能斥去其人亦不謂無功於宗教。朕尙聞英人在彼間立城堡矣。名曰紐。句究何紐也。子爵曰：紐約耳。王曰：然。尙有一城曰薄司。句何薄司者。子爵曰：薄司敦。王曰：然。此兩城均海港。利於戰守。乃微語曰：風忒納克將軍苟能驅彼英人。用兵幾許。一聯隊耶。三聯隊耶。子爵搖首曰：王乃未知彼用兵之善。此輩均善戰而不惜命。臣之兵謀僅能自保。此等人外。掊紅人內。不能求助於本國。凡瘟疫猛獸禍害日見。而彼之勇健乃無減於初來時。逐年但見高樹日稀。拓地日廣。前此豺虎嗥鳴之地。今塵市矣。此等人亦非挑釁於人。頗自愛。非有迫之。亦不走險。顧雖不挑戰於人。而欲令其止兵。亦非易事。今若使新英倫入我掌柄。非一萬五千之精卒。及戰艦二十不易得也。王大躍而起。執杖行怒曰：汝既畏彼人。即請彼人善保其領土。今且勿言。是事朕與。軍機諸臣議行。更以方略示汝。神甫聽之。此爲早禱之期。汝輩少待。朕拜天後。卽至時。有內侍上聖。經王掣之。而行。諸臣分列。厲行讓。王出。王出後。乃復聚而語。

第三章

方王與諸大臣語時亞摩雷守護門外備傳呼然入朝者恆與爲禮亞摩雷頗自得以爲榮顯顧此人在三年前特部伍中走卒自入坎拿大戰紅人得軍功歸時尙隸聯隊一日王騎脫纏亞摩雷適進而挽之王大悅即升擢爲羽林大尉年少而得寵於王人人乃咸加以愛慕顧今日身處王宮觸目錦繡琳琅轉以當日野戰爲適寢宮之次忽爾馳心於新世界空山野水之中偶然引首見當時舊帥則子爵也即趨進曰風忒納克將軍不審我矣子爵大驚曰德嘉鐵納不圖此間與故人相見汝升遷矣起家勁旅遽儕羽林升擢之迅乃無一人及汝大尉曰吾亦不審其樂但覺當時據獨木舟乘急流而下四山林木聳然而過吾尙憶此景光也子爵歎息曰汝運佳我乃不辰吾今奉勅歸朝以德拉巴爾見待矣試問彼間邊事之棘斯人果能了耶實告汝紅人跳舞於前英人潛燭於後不久當來籲我我且候之耳今我當見王能否引動王心及於美洲若我得大權自問可以一變史局亞摩雷笑曰將軍語羽

林中人乃作悖逆語耶彼此一笑子爵復進寢殿矣子爵入時尤有一人衣黑錦衣以銀爲肩章岸然而入似自信有門籍可以逕進者而亞摩雷立以身當門語曰貴人德微翁恕我奉勅不聽貴人更入是間德微翁大驚曰汝狂易耶吾胡不能入亞摩雷曰廷旨如是德微翁曰得毋誤乎世安有其事大尉曰吾亦甚願其誤德微翁曰旣云誤矣胡不聽入亞摩雷曰聖旨焉敢抗德微翁曰但得與王一言亞摩雷曰是焉敢者德微翁曰一言亦不許進耶亞摩雷曰吾何敢抗貴人德微翁頓足怒視禁門翻身而出德微翁行後亞摩雷自撲其微鬚曰此去而老姊來矣我遵旨亦必拒其人不如是違聖意奈何我自問甯守礮臺以禦紅人萬不願守宮而禦此辛烈之婦人噫婦人至矣旣而曰幸不爲彼姊也即鞠躬向此女子曰女侍史南穠無恙南穠亦曰大尉德嘉鐵納無恙南穠者美目絳頰衣樸素之衣則時世妝也大尉曰鄙人在此侍直不敢喋喋以誤公事南穠卽弩其脣櫻僞怒曰我何嘗求與爾言大尉曰汝脣櫻必勿動一動而吾語不能禁矣今爾手中所提者何物南穠曰此爲

馬丹曼忒農以書上陛下大尉幸爲我傳之大尉曰此奚不可者今日馬丹如何南
穠曰神甫晨至論道者久復曰汝爲新教中人此等語似不欲聞大尉曰吾於新舊
兩教均少著意以我思之兩者均可惟家人則崇新而遠舊故吾亦不能不爾南穠
曰汝苟以此語語馬丹馬丹必有大力使爾信國教大尉笑曰我不欲與馬丹言特
欲與女侍史言耳方欲更言則挺然又見一婦人至不期失聲而呼南穠已走避而
去來者衣飾華美金碧照眼頸上蒙以霧縠玉肌似露非露身上珠鑽之屬每得一
顆可敵一中人之產年事已過少艾而容色之嬌媚至今尙稱爲法國第一麗人也
亞摩雷始乃慄懼至是懼心已卻生羨慕之心卽以手加額致敬女曰汝爲大尉德
嘉鐵納耶語已一笑亞摩雷膽魄皆落左右不知所可卽鞠躬稱曰俟爵我爲爵府
雷曰俟爵能否以言中之意示走卒孟忒斯班曰汝爲舊人必不至有此大誤我意乍所傳者失辭也亞摩
雷走之賤僕孟忒斯班曰汝爲舊人必不至有此大誤我意乍所傳者失辭也亞摩
雷曰俟爵能否以言中之意示走卒孟忒斯班曰此爲吾兄弟德微翁所遇事語之
令人齒冷彼謂入面陛下竟有人絕其門籍此何理也亞摩雷曰此爲走卒不幸竟

承此值適所爲事。走卒爲之也。孟忒斯班曰。此大尉所爲耶。是何權力。至爾此時。挺立而怒。亞摩雷鞠躬曰。走卒承王旨耳。孟忒斯班曰。王旨耶。奈何踐及吾家之人。此旨親授之王躬耶。亞摩雷曰。彭登傳諭而來。孟忒斯班曰。世安有是理。王乃託賤侍傳言辱吾家人乎。大尉汝在夢中矣。亞摩雷曰。如侯爵言。走卒亦但願此事爲夢境。孟忒斯班曰。此夢噩哉。汝入面王。吾在是與王語。亞摩雷曰。走卒焉有力者。孟忒斯班曰。是何也。走卒奉旨。不令更通宮門外事。曰。何書均不能進耶。亞摩雷曰。唯馬丹書不令通。孟忒斯班曰。大尉之辱我。以此語爲極致矣。彼無恥之淫婢。汝乃能致其書。而孟忒斯班俟獨不能爲傳一紙。亞摩雷曰。此走卒奉勅而然而心之抱疚。至於匪極。孟忒斯班曰。爾亦無須飾說。惟不悔者斯得矣。今更與爾以自新之路。爾終竟能爲我傳語否。亞摩雷鞠躬曰。實不敢昧死上言。孟忒斯班曰。然則我自行矣。竟奪門入大尉當門止之。哀鳴曰。馬丹幸赦吾死。卽如此亦妨爲同僚所矚。於馬丹殊有損失。孟忒斯班四顧羽林。言曰。吾必面王。不面不止。亞摩雷曰。王宮中尙與廷臣會

議。尙無女侍中一人。孟忒斯班曰。我何妨卽爲第一人。亞摩雷曰。馬丹入吾頭斷矣。孟忒斯班曰。何恤。若首我必欲進方擇持不決間。亞摩雷智計忽生。知馬丹決入必非己身所禦。又不能以強力屈其人。且前數日間。法國大權尙居其人掌握。矧以斯人之美。及其智力。未必遂無更握重權之日。若決不使入。則銜忿旣深。已命亦殆。顧一聽之入。則此身亦不可問。於是遂定策。告馬丹曰。果馬丹能少待者。王已入禮拜。堂早禱。且出要之於道。必可得也。馬丹曰。時至未且。以我胡爲待王。如臧獲之伺主人。亞摩雷曰。爲時至迅行。卽屆矣。馬丹曰。我焉能待。仍將奪門以進。亞摩雷聞屋中履聲動。知王出矣。因思能以語牽綴之。則可自免於死。卽曰。吾爲馬丹將消息不甯佳耶。馬丹曰。爾悟矣。爾趣入告王。亞摩雷曰。譬如吾未面王。轉之通謁之。大臣可乎。馬丹曰。仍爾自言之。亞摩雷曰。此語卽衆中言耶。馬丹曰。私言之可爾。亞摩雷語窮。而王仍未出。復曰。馬丹見王。何爲試告我。王苟發問。吾亦足以備對。馬丹曰。汝風耶。我所言者。汝言之足矣。胡喋喋爲正於此時。寢宮關。王出侍臣皆從王行。剛及門。卽

立語亞摩雷曰有人以書與汝耶亞摩雷卽上南穠書王納之衣中剛舉首見馬丹孟忒斯班當門而立王怒欲徑越馬丹而行馬丹亦隨王行王曰朕今日不欲面爾馬丹曰我亦不料今日乃蒙此辱王曰馬丹朕何辱汝汝得母昧昧馬丹曰惟王昧昧忘我耳我固未嘗昧也王曰汝胡爲犯我蹕路馬丹曰我當得何辜或王見遺請王進止且我爲愛王之人卽爲王斃於廷杖甘之惟吾弟無罪乃見屏於宿衛之臣吾焉能甘王曰此非言事之時馬丹曰當以何時面王王曰吾將行幸爾家馬丹曰何時王曰四句鐘耳馬丹曰旣如是吾亦不更擾王與王爲禮賦媚之態嫣然動人遂行自念吾色未衰尙足以句王之眷顧也

第四章

魯意王今日早禱見屈於婦人心滋怏怏翕脣攢眉亦知馬丹之爲人有權謀力能犯上且敢播吾惡於大陸將爲全歐君王所嗤鄙旣而自思求免其謗誣而又自脫於濁穢則將以何術馭之自念生平御女極繁棄置之者亦夥但一示以顏色卽自

引退惟此人者求其辭尊居卑則非力戰不爲屈適言冤抑而彼何冤何抑者外史氏曰魯意之爲君初不審人間有冤抑事以爲人之受其凌踐者皆分所誠甘卽以馬丹論承恩者十五年屏棄其夫不當夕一日見斥於王亦云抑矣顧魯意則以爲此十五年中均承恩澤卽捐棄之爲幸多矣且吾旣不悅其人卽當引退但思前恩已當涕零雖不欲其人然尙頒朝廷之俸卽其子亦等之儲貳之列特少教耳如是而仍弗悅則可云清濁莫辨矣禱時雖聞主教講經而中心仍念念茲事自以爲非錯顧魯意之視上帝特品級稍高之魯意卽天堂亦稍宏敞之離宮耳蓋已之一身令萬方尊禮則上帝位高於己在法亦應尊禮此時不能與魯意更論天良也卽當時冊立西班牙王后後亦無日不無外嬖今王后山陵而王之眷顧外婦隨日而遷年鬢稍高欲少靖宸躬計更與孟忒斯班同處似決無甯謐之日馬丹曼忒農者爲孟忒斯班招入宮中爲保氏以伺此所生之兩兒顧王覲面已悅其人初入宮王常

臨幸其居。二子跳踉曼忒農潛心調養王坐其所居處。至於經時之久不忍去也。王之省此兩兒意良不在兒而在其保氏久之與。曼忒農諗則與之商畧宮中事。凡曼忒農所發語王匪不行較之。相臣建議王后徽音尤重。曼忒農初無一語挑王。王不之信。以爲僞行。謂此美人獨處禁中。雖在中年。詎獨無情。胡爲翛然如女冠。有時以語挑之。曼忒農卽以正言止王。王一身處穠豔之間。顧得蕭曠之美人。轉生靜趣。於是每及下午必蒞是間。覺曼忒農所言皆衍衍正論。無有邪辟。所論列均民生國計。趣味醇然。語類牧師而牧師又屬美人。較之長襟多鬢者。覺勝也。王於是於二美之間。不能不加以簡擇。然此二人宗旨殊反。一濃一淡。王斷不能周旋於二氏之間。而咸得其當。實則王之所習實近繁華。亦不能遽忘孟忒斯班。而王之神甫則時時勸王以惜身養德。卽曼忒農之導王亦復如是。王心動計非逐孟忒斯班者。決不能自靜。其躬享清閒之福。留之禁籞。必以術納我於穀中。今決去之。勿令更萌妄念。凡此種思念。均在對越上帝之時。而貴族大臣命婦。均侍王於禮堂中。此大臣命婦者。初

不必以禮拜爲重。第王心所向不趨是無以爭妍而取憐故聽講之時勉支倦態咸
懵然若近睡鄉。尚有手捧聖經者其上實加以時新之小說。命婦明虔每人之前各
一燭本以燭此聖經實則欲顯其玉容令王寵顧王維僞爲好道遂令通國之人
皆僞在禮。王禱後回宮許民間有不直事自陳於道左。今晨道訟已有數人其一耕
牛爲獵狗所噬。其一佃人爲主人所虐。咸乞哀於王。王草草問已卽勅宰相爲平其
獄。魯意者雖名暴君顧爲暴者但專諸一身而有司則不能更聽其肆虐。王問已欲
行忽有老人突前屈膝道左稱冤。王曰叟何事者老人曰臣爲巴黎人含冤不能自
直。王曰朕觀爾爲文人卽有冤者朕爲理之汝試直陳以達我老人曰大尉達而自
以藍布騎士二十人住臣家食臣之食奪臣之產鞭臣臧獲上之有司有司不爲理。
王大怒曰輦轂之下一大尉敢如是耶。主教布素曰此事滋可羞神甫拉歇司曰是
中蓋有故臣請陛下叩之何名何業此騎士胡爲竟入其家。王問老人曰神甫之言。
汝聞之耶老人曰陛下聽之臣名嘉鐵納布賈也以臣所信者爲新教官中故以兵

至神甫曰吾固知其必有故耳布素曰此則又當別論王不悅謂嘉鐵納曰汝有枉
當自直之母與朕也老人曰臣將有法足以自直王曰汝但從真教斯得矣老人曰
臣所從者固真教也王頓足曰汝異端瀆正教厥罪大矣法蘭西但有一教會爲朕
所服膺者卽爲真教汝旣背教則朕亦胡能助汝老人曰臣所奉教亦祖父之相沿
者王曰爾祖父固罪人矣汝奈何亦躬蹈罪罟朕之先皇臨崩時始歸正教蓋知過
而改者老人曰然則陛下威力不能助臣矣王曰汝欲求助當先自助老人怏怏而
起王亦歸主教及神甫竊竊議王仁聖神甫曰陛下善能處此狂叟也布素曰陛下
良不愧爲宗教長子神甫曰陛下果聖魯意適傳然王心良不自慰因曰國家處此
新教亦微酷神甫曰是焉能酷陛下之誤誤於慈耳王曰朕聞新教之人將結大股
避地而去神甫曰此尤佳事國中無一異端固吾法之福布素曰凡人不能竭誠於
天主者安能盡力於陛下果使攜貳之人盡徙則國中清謐多矣王曰先皇固未嘗
偏此異端曾在南池以璽書令世子孫遵率神甫曰旣先皇有過陛下爲先皇晚

蓋亦復盛德。王曰何名。晚蓋神甫曰。收取先皇璽書行其新令可爾。王曰吾苟收此璽書。則新教中可二十萬人半爲精壯。以此資敵。國甯不危。實則朕之事。宗教極虔。惟今日風忒納克所言。教會中干與政治亦非善着。謂宰相曰。羅武乙汝意云何者。宰相曰。臣亦無敢顯背宗教。惟此宗信異教之人。若有厲鬼保護能昌其所業。今國家賦稅出諸異教者半。彼輩果行稅從。何出今流亡已多。果更縱之行者。則國中較敗亡爲酷。布素曰。惟陛下不右新教之人。而新教人自爾歸服國教。若先皇南池之諭。不毀者。則人民將謂皇家尙容我。則主教又何爲者。王搖首曰。汝謂新教之人。卽從令耶。彼固執之性。非言所喻。羅武乙以目視布素。言曰。果國教之廟產報効國家。卽新教徒逃亡都盡於國課。亦無所損。布素曰。教會中所有。卽王有也。王曰。國度爲我所有。則國中之產亦無一非我者。惟不至窮迫。教會中產一不之動。主教及神甫同聲皆贊。聖明此時已進宮。卽曰此事且置弗議。俟與度支大臣商酌。曼沙今安在者。朕欲觀新造馬來離宮圖式。曼沙卽上其圖。王展而觀之。問今日經營已至何許。

方王與曼沙觀圖時。神甫卽引布素衣言曰。今日所言。王似感動矣。布素曰。更得神甫助我。或且有成。神甫曰。能益正教。無不盡力。布素曰。但得神甫一言。即可云此事告成矣。神甫曰。尙有一人。力量較我爲巨。布素曰。非王寵人孟忒西班牙神甫。曰否。彼人佳運已盡。吾所云者。馬丹曼忒農也。布素曰。聞斯人禮重教門。神甫曰。然。彼雖正教派別略與吾異。然吾意甚欲曲徇其人。明日願主教往面其人。與之商略。布素曰。可。吾明日決言之。神甫曰。見時當語以盡驅新教之人。則足稱國教之功臣。布素曰。諾。神甫曰。語彼時。尙須以利誘之。卽附耳與主教微語。主教大驚曰。此事或忤陛下之旨。神甫曰。何忤旨之有。東朝不已告殂耶。布素曰。東朝卽殂。詎王以司加龍寡婦。冊立爲中宮耶。神甫曰。彼家世非微。彼妹之祖父亦甚有寵於先皇。布素曰。以我卜之。必不獲命。神甫曰。我知王心。王必如我所料。布素曰。爾久侍王。或能知之。惟我。則焉知者。神甫曰。今日告爾。當了了矣。一言以蔽之。曰。此女果助教會。教會亦必助。彼言已。卽曰。王方招我。我行矣。布素沈吟思索。時朝貴咸戾殿中。已無容足之地。而

衣服皆棕色灰色黑色無一繁麗者。以王方矜寵。曼忒農好素服。故王亦去其麗都者。而朝臣一一亦皆風靡然。當王業侈時。而大臣衣飾之華竟與女人鬪豔。今則惟有武人肩章衣飾。尚存舊儀耳。朝紳之中。匪特衣服全歸樸素。卽平日酒色之客。亦一一斂爲道學。以王與曼忒農方講道學。侍臣亦從而道學耳。如是大國大臣。則但知卑污苟賤。以媚王而王之淫昏於二蕩婦間。尙不能自決其愛憎。取舍然而法國生靈之命脈已繫屬於此時矣。

第五章

老嘉鐵納以叩闔不能得當。憂憤之色見於顏面。老人頹瘦不加假髮。亦不加以粉飾。以老人星星之髮。固已白矣。年雖老大。而當王屏斥之時。怒氣亦勃發。足見其少年時之勇概。今尙未減。此時左手執冠。右手執牘。將以上王者。及是則廢然而返。當是之時。新教之徒。雖未駢戮。然朝廷之意。直姑容其人。蟲之輩。下非有愛之也。且新教徒亦無同等法律之保護。而二十年來。有司虐處新教之人。日乃加酷。等一貿易。

新教之稅則亦重於故教。尤不能仕之於朝。新教之子弟。若有忤逆弑父等事。朝廷以爲異類。斥不之理。國中小人。亦從而凌譏脅削。訟之皆置勿問。顧此新教之人。尙戀戀祖國。不欲徙而之他。今則雖欲忍之。亦有所不可矣。時老人所立處未遠。有二衛卒見老人抱牘上陳王不之許。而老人尙亭立彼間。如有所思。二衛卒遂前問曰。禱告文。斥新教之言汝何爲弗行。其一曰。汝侍立王宮之旁。汚穢禁地。汝果何人。乃敢背王所信之宗教。其心可誅也。老人鄙夷視此二衛卒。方欲行時。一卒竟以白梃抵老人之胸脇。斥之曰。狗。吾爲王家衛士。汝敢以怒目報我耶。老人以手自拊其脣。言曰。汝冤鬼之兒郎。我若爲二十年者。汝何敢爾。衛卒曰。汝敢詆我耶。卽呼其伙伴曰。安特爾。彼詆吾輩。今當擒而歸諸營房。於是二卒咸置其白梃。同進顧此二衛卒。雖在盛年。亦不能猝服此老。老人二膊絕有力。進卽卻之。已而微喘。遂爲二卒反翦。方老人就縛時。忽見有勇者銳聲呼止。刀光耀眼。二衛卒立止來者。卽爲德嘉鐵納大尉。方罷。值內廷見有人爭鬪於宮門之外。旣見爲老人反翦。則拔刀而進。二衛卒見狀。

匪特不敢更取老人則咸後郤其身幾於翻撲亞摩雷曰汝二憾在此何作其一人以手引冠行禮言曰大尉此爲新教徒乃敢嫚及王家宿衛之士其一人曰彼至叩闔不見許仍濡滯弗行亞摩雷大怒曰安分守己之民求王仲理爾瑞士狗乃敢凌詆其人我決不汝許因出銀管吹之已見一曹長領十餘卒自營房中出大尉問此二人曰汝何名趣告我其一曰安特爾其一曰尼古拉司大尉曰曹長請縛此二人曹長曰諾大尉曰今日卽當審訊曹長曰所犯何罪大尉曰以彼無端肆虐於老民二衛士曰彼自承爲新教徒曹長肅然曰大尉似此等事不能加彼以罪請大尉別抵以罪名大尉曰彼值班在此竟委白梃於地此大不敬且汚其號衣曹長曰可顧二卒曰汝置白梃於地蔑本國朝儀今請爾跨一點鐘木馬以警爾白梃者爲防護內廷所用非恣爾用以侮人者因顧侍者縛此二人立正向左轉開步走於是諸卒前導曹長隨行而去老人此時俯首無聲至諸人行後於是二人接手至親密老人曰亞摩雷吾乃不審於是間遇爾亞摩雷曰吾亦云然惟老人胡不在巴黎而至非

色野老人曰吾有冤抑之事彼舊教徒處我至酷吾若不至叩閻有司焉能直我亞摩雷曰王心尙仁而左右爭以五色玻璃掩其目故視物恆謬且王不許族父請乎老人曰王斥我不許吾請亞摩雷曰王曾問族父姓乎老人曰王問我我亦質言大尉聞言無聲但有噫氣言曰果王知族父爲我家人恐大尉一官亦不能淹久老人曰王安能并我二人爲一罪惟爾終日居魔鬼之鄉安能不事僞神亞摩雷曰吾之宗教隱之中心老人曰險哉汝能爲上帝衛道其勢似難亞摩雷曰族父吾爲王家武人但知爲國宣勞取榮寵至教士之衣白衣吾無問焉老人曰汝固得榮寵然爾族見逼於人無可伸理汝固未屬心於此亞摩雷曰吾家有何事老人曰近有二十異教之徒以大尉達而白忒爲之領袖屯吾家亞摩雷曰此爲騎隊中之大尉吾尙與之有嫌老人曰此人幾傾吾家亞摩雷曰其狀如何老人曰彼分屯此二十人上下皆徧彼則高踞吾室以二脚躡我溫榻之上口噙菸斗手中執酒口中肆詈老僕斐爾爲彼所株亞摩雷愕然曰如是耶老人曰彼推我至於地窖亞摩雷又驚曰

然耶。老人曰汝知彼胡爲有此狀。彼欲摟我雅德爾。我往止之。故爾。亞摩雷方在盛怒。聞狀愈憤。遂引老人同奔路上。遇所知見狀咸駭。此時亞摩雷方躁烈亦不之顧。旣出禁地。即問曰族父來時步耶。車耶。老人曰車也。亞摩雷曰車又安在。老人遙指曰尚在彼間。亞摩雷曰趣登車。老人曰汝亦同行耶。亞摩雷曰家人如是之被擾。正須有人以刀防護。老人曰至時如何。亞摩雷曰我將與達爾白忒辨白。老人曰然則吾適斥爾。背吾宗教。直枉汝矣。亞摩雷曰吾亦不審新舊之教。但雅德爾所奉教。即紅人之妖神。有犯之者。吾卽培之。於是及車。即曰御者趣行。此一句鐘中。即至巴黎。者當予爾以重資。時車製未善。路復不平。車行絕漫。御者圖得錢。遂極力鞭馬。令前車行道旁之樹。如飛越而過。大尉尙以爲漫。時時以語叩老人曰。此騎士以何時至老人曰。昨日黃昏耳。亞摩雷曰雅德爾。又安在。老人曰。仍家居。亞摩雷曰達爾白忒。又安在。老人曰。亦在吾家。亞摩雷曰弱息在家。狼豕環伺。族父乃置之而赴離宮。上訴此何理耶。老人曰。吾已封鑰吾女於密室。亞摩雷曰一鎖胡能支羣凶之狂噬語。

時。幾。欲。飛。越。而。歸。老。人。曰。老。僕。斐。爾。亦。在。彼。亞。摩。雷。曰。老。僕。何。能。老。人。曰。亞。摩。斯。格。
林。亦。居。吾。家。亞。摩。雷。曰。彼。尙。可。恃。以。狀。卜。之。尙。類。英。雄。老。人。曰。彼。母。亦。爲。法。人。曾。奉。
正。教。蓋。知。王。仇。吾。教。故。預。爲。斂。避。凶。鋒。此。孺。子。故。能。作。法。國。語。惟。性。質。少。殊。亞。摩。雷。
曰。斯。人。之。來。正。值。宗。國。多。事。之。秋。良。爲。非。福。老。人。曰。又。安。知。非。福。者。亞。摩。雷。曰。族。父。
出。時。以。家。託。格。林。矣。老。人。曰。吾。出。時。彼。方。與。達。爾。白。忒。同。坐。語。以。故。事。亞。摩。雷。曰。彼。
以。生。人。處。生。地。胡。能。保。衛。吾。家。族。父。此。來。誤。矣。老。人。曰。吾。女。自。得。上。帝。之。佑。亞。摩。雷。
曰。吾。亦。云。然。惟。此。車。胡。久。久。不。至。然。引。首。車。箱。之。外。望。巴。黎。城。隱。隱。已。見。而。城。中。禮。
拜。寺。之。塔。已。一。出。其。尖。至。於。愈。近。愈。見。城。隍。少。須。直。入。城。門。大。尉。入。城。時。以。目。外。
盼。既。乃。及。聖。馬。丁。街。門。外。羣。人。攢。集。無。數。

第六章

老人家爲四層高樓。屋宇極舊。頂上之樓積貨。第三第四兩層。則精潔無倫。臨衢有月臺。並鐵闌。可以遠望。二人下車時。門外羣人爭仰。樓上如有所怖。駭狀。亞。摩。雷。仰。

望見有一人衣衛士衣以首下嚮二足上仰如有人倒持之者此衛士之冠及假髮皆墜於地但見以首下垂去地可五十尺顏色慘白二目皆閉不敢下視號援之聲市人皆一一聞之其上有少年俯身闌干以二手執衛士之股屹無少動迴面內嚮似備刦取之人又似背後有人欲進未進狀忽又聞衛士大號則此少年已釋其一手但以一手執衛士股衛士欲以手摸牆壁欲得物以自止顧乃凌虛莫得口中言曰趣引我登詎爾直以此死我耶吾所部趣見救但聞此少年言曰大尉汝欲登耶衛士曰少年看天主之面免吾死少年曰汝呼爾所部趣下勿躡吾後大尉曰爾輩趣避汝不見爾長官將成虀粉耶胡不行遂見窗後之人一一下樓少年曰此尙可恕引手略高而此倒懸之衛士已得以手攀其鐵闌少年曰汝能自登耶衛士曰尙須力引吾足幸勿脫手吾或可上少年曰此何容易爾於此時甘言媚人吾不汝信私衛士曰吾但求生百凡從令少年曰時至自令爾登爾今上下倒立似不能傾吐已衛士曰然則爾必欲死我耶少年曰否吾必生爾衛士曰上帝賜福爾躬少年曰

爾欲登者當立約誓。衛士曰：百凡皆允。因曰：吾攀闌不住矣。少年曰：吾釋汝後汝當領其所部趣退勿擾此家老少汝能允否？衛士曰：可。少年曰：汝言能否如約？衛士曰：但起吾身諸非所恤。少年曰：是安可得？此時足與爾言後此或不吾允吾不審是間法律如何？惟爾不能納我於禍。衛士曰：決不爾涉。但起吾身可爾。少年曰：起矣。語後一抽其左足而衛士已入闌中賓之地。上其始衛士閉目片時許而所部兵咸同聲稱慶。衛士之生衛士移時亦起立直奔下樓。先是德嘉鐵納尙引目癡盼樓窗既見衛士起奔始恍然如覺亦遂巡入門時門外聞人如鶴及見亞摩雷衣羽林宿衛之衣則皆斂避於是二人同入甫及門而老僕斐爾方俟門次及見老人卽曰：主人樓上人幾欲處此美洲新客以強死。主人試聽樓上何聲者時樓上果有繁雜之履聲。移時礮然如巨物乍墜則羣靴踵疊而下於是二人同登甫及第二層樓見第三層樓有一巨鐘自空擲下細輪木片飛濺人面忽又四人同糾相抱而下彼此吼喘厥聲如牛。四人中有一人服平民之衣餘三人則兵衣也。顧此衣平民之衣者氣力至

偉。左右麾掃三人者皆不能近。此時卽有兵躡步而下欲以手扼此壯士之吭。壯士疾敵其食指。兵官立縮指納之。口中右手引劍欲刺壯士而德嘉鐵納已前引兵官衣曰達而白忒汝狂謬至是耶。時羣兵見德嘉鐵納衣羽衣大尉之服亦皆愕然。達而白忒收其刃卓立對視。此時三人亦已釋壯士坐而喘息。格林則自拂拭其衣袂去塵土。亞摩雷亦出刀於鞘曰達而白忒爾我本有夙仇宜一清理。達而白忒曰我今日奉勅而來。亞摩雷曰知之汝第拔劍備我。達而白忒又曰奉勅而來。亞摩雷曰知之汝第拔劍。達而白忒曰與爾初無宿憾。亞摩雷立批其頰曰此甯言無憾乎。達而白忒曰左右汝趣揚械呼樓上之卒亦同下。此將是人反翦我蓋奉勅縛此人也。卽彼人亦反翦之。於是樓上可十數人爭下。此三人本欲擒格林者。於是復前撲格林斂避奪老人之棒。至亞摩雷身次曰以我二人當此二十一人。亞摩雷指達而白忒曰汝趣去爾牙爪以理相撲。達而白忒曰我何爲言理。汝爲布佛之子。又新教之徒縛爾足矣。亞摩雷曰鼠子我今以刀鋒鐫汝面作一鼠子語已立挺其劍刺達而

白忒此時非有物相抵者胸洞矣顧達而白忒力重而亞摩雷之刃立斷達而白忒大悅乘勢以刀刺亞摩雷格林之棒忽起達而白忒刃立飛越此時有兵出手槍去亞摩雷首可徑尺彈且出忽有年老之人捷入以威重之聲斥曰衆且舍其兵器衆立時果舍其兵如奉將令老人四顧久其人蓋瘦小一翁門牙盡露帶白假髮作螺旋掩其仄肩細頸不露於外衣爲灰色絨緣以金飾著高韃冠三角描金之冠望而知爲武弁中之領袖眼蓄威光雅步抗聲均似柄權據勢之人實則國之內外苟聞其名人匪不知者國中舍王以外爵位最尊者卽爲其人戰功名爵在在足以震人其人康德親王也手金鼻煙壺張其細眼挺立衆皆木然如癡亞摩雷拾其斷劍與王爲禮王曰前在萊茵河兵間固曾見汝且稔亞摩雷曰殿下臣前此曾在辟卡迭聯隊中姓德嘉鐵納王曰憶之卽顧達而白忒曰汝何名達而白忒曰臣爲大尉達而白忒屬蘭桂道克藍衣騎隊王曰吾乍以車過此汝乃倒懸於樓窗後此少年放爾時曾有條約格林進曰立誓以後言卽以兵行及釋之不治乃卽麾所部與小人

爲難。王笑謂達而白忒曰汝何無信。信誓尚且背之。達而白忒曰彼爲新教之人不能與之定約。王曰約固定之第不守也。又語格林曰汝旣倒提其人胡不釋之下墜。格林曰小人以人信。彼謂爲不欺。王曰愿哉。少年格林曰小人少與紅人貿易。矢信自誓。習爲成性。故但知踐言而已。王曰彼野蠻一語汝乃信之如帝國大尉耶。格林曰一句鐘前。小人信之至堅。不敢疑其食言。王以鼻煙納之鼻中。卽拂拭其餘屑於胸。次言曰汝乃神勇。旣而顧盼。格林勇概似至欽慕。言曰汝來自坎拿大乎。格林曰小人至自紐約。縱坎拿大中小人亦經遊涉。王聞紐約。乃不之知。卽曰島乎。格林曰城也。王曰屬何省。格林曰卽名紐約省。王曰都會乎。格林曰非也。都會曰阿爾巴尼。王曰汝乃善國語。格林曰小人之母爲法人。王曰汝至巴黎幾時矣。格林曰昨日。王曰法國亦爾母之祖國。胡爲倒懸此祖國之人於樓窗。格林曰彼狎弄閨秀。小人止之。彼卽出刀將殊。小人小人前趣抵之。彼嗾衆環攻。小人竟捉得其人。倒懸窗口。且告其所部。果前趣者。卽令爾官長爲蠱粉。旣而立誓。始起其人。彼寒盟。嗾衆撲我。因

指亞摩雷曰。非是人至者。小人死矣。王曰。爾殊有肝膽。年少而勇。且善急智。格林曰。小人生小長於煙瘴之區。殊無禮衷。王曰。果新教徒中如爾輩者增多。數人則風忒納克所言。以兵麾斥新教之徒。亦殊不易。易漫謂達而白忒。曰。汝尙何語。達而白忒。曰。臣新奉勅至此。王曰。陛下必非勅汝來戲人家。閨秀。陛下平日寬待婦人。未嘗加以威力。因大笑。聞其鼻煙達而白忒。曰。朝命以臣恣其所如。必令新教徒歸入國教。王復笑。曰。汝眞衛教之功。臣已卽變色。曰。汝趣以所部出此。達而白忒。曰。臣將何以報。命王曰。我面陛下時。爲汝言之。汝勿多言行矣。綜言之。汝但自衛。其功名可爾。達而白忒。聞言。卻走微語。其所部戢尾。出門而去。此時老人進曰。殿下眞爲以色列救主矣。立啟一室。曰。請殿下少飲。臣家王聞言。頗不懼顧。重違其請。亦點首入見屋中。陳飾之美。心頗愕然。地板光明如鏡。櫺簷則白雲母石爲之承座之上。以白堊雕飾。爲花繡。卽離宮之制。亦不過是。王曰。吾車尙在外。今當卽行。吾本少出離宮。至巴黎。不圖偶一至此。竟爲良民。雪枉。試思以一大尉之貴。爲人倒懸。胡能引車遽過。惟老。

人須聽我爾不改教恐不能置身祖國中矣老人歎曰國律待新教人殊刻也王曰吾聞尙有更刻於此者行宣布國中矣汝胡不作避地之計老人曰耆民生爲法國之身安忍舍我祖國且立業在是亦難遽舍王曰汝言亦有道惟風迅胡不曲身避之老人大驚以爲改教則張皇形於顫色王覺卽曰汝勿怖我亦非強汝改教也且爾女郎又安在茲事非彼肇之耶此時斐爾將銀槃陳玻璃杯入老人曰雅德爾姑娘如何斐爾曰仍居屋中然雅德爾實已出聞聲卽答曰孺子在是隨聲入室以手抱老人之頸曰兇人不聽老父創瘡耶老人曰天幸咸無恙雅仗康德親王惠臨吾家當拜王賜雅德爾見王王二目突出注其玉容則立俯其首不敢視王口中言曰願上帝賜福殿下其聲旣羞且顫二頰盡絳貌乃愈美王於宮中美人面之已多且年近六十及見雅德爾亦頻頻眷注不已即鞠躬言曰姑娘今日見爾甚願縮吾年命四十歲也雅德爾曰王於此四十年中功業爛然吾國安忍縮王此四十年中之勳績王大悅曰此女不但貌佳且有才思語老人曰若女儘可貢之宮廷老人曰此

念。胡。敢。存。臣。女。蓋。清。白。家。風。也。王。笑。曰。此。語。曠。宮。省。矣。顧。以。若。家。賢。女。宜。出。而。聞。雅。樂。歷。歡。場。長。其。見。識。較。諸。長。閉。是。間。但。有。馬。丁。街。人。物。過。眼。喪。失。不。已。多。乎。殆。二。煩。紅。潮。一。退。便。非。青。春。行。樂。之。時。雅。德。爾。曰。臣。女。隨。親。親。在。女。心。足。此。外。無。復。多。求。老。人。顧。雅。德。爾。曰。汝。謝。王。歸。矣。蓋。王。年。雖。六。十。於。女。郎。隊。中。初。無。佳。名。以。方。與。雅。德。爾。語。時。且。行。且。邇。幾。於。以。手。近。引。其。衣。且。眼。光。如。鼠。之。值。物。厥。狀。甚。狎。此。時。女。聞。言。卽。出。王。曰。老。人。乃。防。我。乎。鶯。雖。離。齡。而。神。鷹。已。老。奈。何。防。也。且。爾。女。秀。外。慧。中。大。類。神。軀。下。履。塵。世。諸。君。怒。我。行。矣。亞。摩。雷。自。窗。中。外。觀。見。王。登。金。飾。朱。輪。之。車。向。非。色。野。行。亞。摩。雷。回。首。見。格。林。言。曰。今。日。固。恃。王。然。吾。友。之。功。乃。至。偉。吾。友。乃。舍。其。性。命。出。雅。德。爾。且。非。君。一。棒。則。刀。洞。吾。胸。恐。難。與。君。把。晤。矣。今。爾。且。出。手。授。我。此。爲。我。一。生。不。能。忘。君。之。事。此。時。老。人。送。王。歸。卽。曰。亞。摩。雷。汝。當。謝。我。故。人。之。子。格。林。汝。來。老。人。爲。爾。祝。福。今。日。之。事。汝。卽。爲。吾。子。者。盡。職。亦。但。如。是。格。林。初。與。人。鬪。一。無。所。怯。今。聞。二。人。贊。歎。則。瑟。縮。不。可。自。聊。但。曰。吾。母。尙。有。二。姊。妹。在。彼。新。世。界。詎。能。見。人。之。閨。

秀見欺於人而乃不怒。老人曰：汝之愛重女人，蓋爲念母及女兄弟之故。格林曰：吾新世界中風俗至敬女人，惟彼間女子少，或以此故，生其敬禮耳。若在舊世界中，陶情之事多，卽無女子，亦無不歡之事。吾常行獵於外舍紅人外，初不遇一女郎，殆及歸家。吾女兄弟以雅樂悅我。吾母則敍述法國故事，且言以異教之故，見凌於國衆。故覺女人之慈祥高於男子。雅德爾曰：若是言之，則身爲巾幘中人，咸當感君覆幬。吾兄旣勇而又長，於詞雅德爾者，本奉父命而入，因見親王旣行，而格林復持正論，故卽門次而作此答語。格林者，亦非訥口之人，今日氣伸，意得尤洋洋，吐其詞藻，迨旣聞雅德爾稱頌其義，又忸怩不可狀。卽言曰：不才生長林木之間，幾於不能作應對語，何名善言？以此之故，故老父令僕至故國習禮，庶不至老大儕於紅人。亞摩雷曰：吾兄意留此幾時者？格林曰：待愛勿倫來迓者，我歸矣。亞摩雷曰：愛勿倫又屬何人？格林曰：爲金棍艦之船長。亞摩雷曰：此船爲老兄家畜乎？格林曰：然爲老父所購。此船間涉於白列司託，而及羅昂之間，購取貨物，迨裝載旣滿，則至是間見迓。斯時。

吾行矣。亞摩雷曰。老兄以巴黎爲何如。格林微笑曰。鄙人未來。則人人咸稱巴黎。然今日略觀梗概。果較所聞者爲佳。亞摩雷曰。巴黎尙有佳者。君惜未見。格林曰。昨日以馬入諸是間。觸目繁華。心已覺異。紐約亦巨城也。吾聞其城中居三千人。中可四百人能戰矣。吾尙未信此戰士之夥。惟彼間爲上帝所手造之物。天然動目。今至是間。則舍壞墻。墻外無他物。君輩鬱鬱居於是間。胡乃不病。然則體力壯耳。雅德爾曰。兄言吾輩鬱鬱居此。然吾輩正謂老兄以血肉之軀。乃坐臥林薄。竟不爲瘴癘所中。滋可怪耳。況野曠天空。獨來獨往。胡以不至於迷失道路。格林曰。吾方怪君輩在百折街衢之中。樓臺相望。甬道屈曲。何由能辨道路。此正足怪耳。今但願夜來。天氣佳。雅德爾曰。天氣佳者。與兄胡涉。格林曰。天清足以占星。雅德爾曰。雖占星。而星之躔度。久久不易。何由辨其方嚮。格林曰。惟其不易嚮。故每行輒辨此而歸。若在白晝中。則用刀尖卽轉折處。鐫一小識。歸時卽用此以辨。亞摩雷聞而大笑曰。君每出。若皆以刀痕爲識。爲役苦矣。且我良足爲君導者。因問老人曰。族父可假我以馬。吾今

將赴非色野。格林可同駐吾營中數日。俾彼領略離宮風物。因曰。麥歇格林。此言如何。格林曰。佳哉。惟我輩同出。留此一老一少。甯無事耶。老人曰。無傷也。康德親王旣有教言。則彼輩必不復至。吾今飭斐爾縹馬。亞摩雷曰。我尙欲與雅德爾言。遂赴女室中而去。

第七章

格林已夙備而亞摩雷久久不下。旣下。則正其衣冠去其戰塵。惟見格林衣飾不雅。則愀然莫適。言曰。足下之衣何來。格林曰。吾攜自紐約。亞摩雷曰。衣材與顏色之間淡。亦頗入時。惟翦裁異制耳。且廣簪之冠。亦巴黎所無。吾今爲君修之。因取衣針少卷其冠簪。言曰。似此則近王家槍隊中人物矣。且爾胡不佩長刀。格林曰。吾出必以槍。亞摩雷驚曰。槍安可佩入禁禦。入且處君以盜。格林曰。卽不以槍。然腰下固有短劍。亞摩雷曰。此直刺客行爲。尤悖於法。今且上馬行矣。二人並騎行於巴黎廣衢之中。狀至不類。亞摩雷衣服容止。均肖法人。格林則蠱笨拙滯。遇物輒注其目。髮短而

晴藍以狀觀。秉父氣多。肖母爲寡。已而出閭市。格林指一廣居。言曰。此爲何所。亞摩雷曰。此爲魯物爾宮。王之離宮也。格林曰。王駐蹕是間乎。曰。否。在非色野。格林驚曰。似此巋然華殿。一人乃兼二宮耶。亞摩雷曰。豈但有二。若聖日耳曼宮。若克勒格尼宮。風丹白露宮。馬婁宮。均爲王居。格林曰。一人能徧居此數宮耶。亞摩雷曰。隨王意所適。格林曰。但以此宮論。侈靡極矣。吾前此在孟忒里奧。而見聖色爾辟司禮拜堂。以爲天下壯觀。若移而置此。尙稱何物。亞摩雷曰。汝曾至坎拿大巨城耶。汝曾憶是間有砲臺。格林曰。憶之。是間尙有上旅館。其旁尙有板屋。在確坊之東。然則君亦至彼矣。亞摩雷曰。吾前此從軍。曾駐彼間。且尙至來白克。汝幸勿謂巴黎城中。但汝一人能作林居。須知鄙人當日。亦曾著平底之鞶。以皮爲衣。以毳爲冠。今日若更令吾服此野蠻之衣。吾尙適耳。格林聞言。大悅。以爲同志道行。遂述坎拿大事爲狀至樂。己而信馬出西南門。曠野中方蒐兵。格林不審。卽曰。若人何作。亞摩雷曰。此爲國家一隊之健兒。格林曰。何多也。詎敵人至耶。亞摩雷曰。國中方承平。故吾輩武人。恆無

事。格林曰。既云承平。須兵何爲。亞摩雷曰。蒐兵以備亂事。格林搖首稱異。曰。既云備矣。胡不私備於家。若在美洲人各藏槍於家。有事集之。已成軍矣。胡必廢正事而習武。亞摩雷曰。吾國大仇者亦多。格林曰。此仇誰致之者。亞摩雷哂曰。王耳。格林曰。既足致外仇。則所爲非道。足協民心耶。亞摩雷大驚曰。汝作此言。旦晚入巴士的而獻大矣。雖然。王即致仇。亦正爲國之故。五年之前。王及西班牙定尼姆關約。此約既定。則於尼柔蘭領土得歸十六砲臺。王尙用兵於司忒拉司堡。勒克森堡。又以幾奴亞不庭。王復用兵。以伸天討。以外皆仇。若兵備少弛者。外兵至矣。格林曰。法國何爲。贊武以召。費亞摩雷曰。吾法爲大國。必如是。榮名始立。格林終不能解。仍信馬快快而行。言曰。昔在司根諾克中。有一偉人。司根諾克人本皆醜樸。而尙信迨此偉人出國事。遂糜爛。以前此彼中人初無盜竊之事。嗣有人曰亨德利克。失一馬。衆乃四覓。卽爲此偉人所有。旣得馬。則並捉其人縊殺之。亞摩雷曰。適爾所用譬語殊大不敬。汝果與我安詳同步於禁地中。則當自捫其舌。格林曰。我焉敢開罪於君。且安知吾言之。

非誤。惟吾爲自由人口不擇言容亦有之。亞摩雷色少霽。言曰。若人人如君所言。則焉用朝廷者。語次。卽曰。爾何事者。此時。格林忽下馬蹲而遠視。如值異物。目光既定。鼻孔亦掀翕無常。亞摩雷見狀大奇。卽引其馬曰。此人見巴黎城狂易作矣。因曰。汝適逢何眚。格林曰。是間有鹿跡。其去未多時。追而捉之。易耳。恨吾未攜洋槍。不爾。今夕得鹿肉矣。亞摩雷曰。汝趣上馬。果如是者。不能歸矣。格林旣上馬。卽曰。此亦誤乎。亞摩雷曰。鹿爲王家所畜殺其一鹿。如殺人之罪。汝以爲在美洲獵場耶。格林曰。鹿乃家畜。殊駭所聞。遂趣馬前。亞摩雷以馬追之。言曰。此間不許馳馬。格林不悅。曰。此地吾殊不之愛。隨地皆張禁網。汝胡不豫告我。以不犯法之事。或不至遽陷科防。今日見飛鴿過吾屋。吾以槍取之。老蒼頭大驚似以我爲槍人者。且老人欲禱告上帝。亦若犯禁令。此又何謂。亞摩雷笑曰。汝果久駐。卽知國家禁律。此間地密人稠。若如爾之自由。則國且不治。今且更語世界之狀。吾聞爾生少長於樹林之間。格林曰。吾十歲時。卽隨季父貿易於西陲紅人部落。亞摩雷曰。其地應聽法人貿易。格林曰。然。

後此吾叔姪二人竟爲法人所禽。故吾言曾至孟忒里阿爾及圭白克。職此故爾。後此不審何事。乃釋我歸新英倫。亞摩雷曰。足下此出尊甫或戀戀不之舍。格林曰。吾翁多金。故令我在是間習禮。以保家。遂以金棍船送我。並請愛勿倫筦我。亞摩雷曰。其人亦紐約產耶。格林曰。非也。其人爲第一至之白人生。彼於薄司敦。亞摩雷曰。村落之名。我久忘矣。格林曰。是間後此之發達。開拓廣於巴黎。仍未可定。亞摩雷笑曰。爾固生長於林間。固有學問。然未必有先知之明。然吾心與彼地膠合無間。亦頗如汝。汝今試從樹罅中觀巍然者。卽王新宮。於是二人勒馬見一巨宮甚廣。爲日所燭。白石射眼作光。飛泉四噴。石象高立。一徑直趣綠陰狀如羊腸。格林神色皆變。亞摩雷問曰。汝觀此如何。格林曰。天造之物。屬美洲。人力之巧。屬歐羅巴。亞摩雷曰。野服安可入歐羅巴中。別苑之佳麗如是者。亦良寡。格林曰。吾能見王乎。亞摩雷曰。否。總朝格林曰。見王時。吾致吾敬不可耶。曰。但問爾面。王行何朝儀。格林曰。吾與王接手。至親稔。問王。佳問王。妻佳於禮足矣。亞摩雷曰。似汝之樸野。王或喜悅。顧禮在當不。

能爾。今質言之。汝終爲樹林中人。以不見王爲佳。蓋汝之入宮。萬衆駭愕。亦猶朝貴野適。不怡於心。語時復言曰。少住。吾見輦道中。有宮車出。格林引目。見前路飛塵滾。滾向二騎而來。少須有紺衣御者。揚鞭出諸飛塵之上。轔轔之聲。亦近二騎讓路。聽宮車過。車中坐一美人。忽爾車停。軒中出玉手。招亞摩雷。亞摩雷曰。此爲馬丹孟忒斯班。實告汝。此人爲法國第一有權之人。汝但觀吾行禮。勿致孟浪。失其儀節。於是引馬近車。脫冠鞠躬。口鼻直近馬蠶之上。格林亦木強效亞摩雷所爲。其狀甚怪。車中美人作惡容曰。大尉吾二人又相遇矣。大尉曰。吾惟運佳方累謁馬丹。馬丹曰。今晨相見。爾或非佳。連亞摩雷曰。誠如馬丹所言。奉勅爲此。吾心甚戚。戚未敢有晷刻之安。馬丹曰。責任固難。然爾奉行勅書。亦太酷烈。亞摩雷曰。馬丹鑒我下走有何力者。馬丹作不屑言曰。汝以我爲動王之力懈耶。大抵爾挫辱舊人。卽得新人之歡。亞摩雷踧躇。自辨不已。馬丹搖手言曰。爾勿喋喋。吾行事。但據其迹。不據其言。汝以我爲容光退王寵衰耶。亞摩雷曰。馬丹吾目非盲。胡乃不辨好醜。格林亦進言曰。爾乃

不辨妍媸。直同角鴟之不見日。馬丹觀格林言曰。此人尙精實可語。今日四點鐘我尙見彼。王也令彼以目光燭我。我之妍媸如何者。彼果爲我所動者。則汝輩直視浮氣爲濃雲。將雨則汝趨向左矣。更以怒目視亞摩雷。驅車而去。格林張目送去。車亞摩雷即引其裾曰。汝生平不見婦人乎。格林曰。似此初未之見。亞摩雷曰。汝服其毒口能噬人乎。格林曰。斯人甚美。然聖馬丁街中亦美人也。亞摩雷曰。汝雖長樹林中而分別妍媸。亦具有識力。格林曰。我久居林中。未窺天人偶一見之。直以神妃相待。未敢玩亵。亞摩雷曰。汝若更在宮庭中。觀婦人人。固皆可愛。若尊之爲神妃者。恐百不得一矣。適此人若力能陷我者。則不遺餘力。以我奉勅守宮。竟開罪其人。蓋一身守護宮庭。猶之獨木舟行於急溜。左右前後。皆石齒。巉巉然觸之。且立碎我以石齒。數曲徑中。無數命婦。閒行於草際。中有一女。見亞摩雷至。卽奔集。此其人卽南穠。爲此輩蕩婦。則獨木之舟。卽類我生之飄泊。時已入宮門。眼前纖草如氈。停車騎無數。曲徑中無數命婦。閒行於草際。中有一女。見亞摩雷至。卽奔集。此其人卽南穠。爲馬丹愛忒農心腹之侍兒。一見卽曰。大尉吾候汝久矣。馬丹有言告爾。今日王令三

點鐘至馬丹許。今茲僅有二十分鐘。大尉可趣入見。亞摩雷曰。吾卽進謁。此時又有偉碩之武弁。其衣飾與亞摩雷同。亞摩雷曰。大尉白里莎克亦在是乎。白里莎克曰。大尉胡來。塵土滿襟。亞摩雷曰。至自巴黎。此爲吾友麥歇格林。今茲有事。託吾友於君。彼新來。可引之少資眼福。且吾馬亦授之尊僕。於是授繮於僕人。與格林接手下馬隨南禮行。

第八章

馬丹曼忒農所居室。至狹小。以當時入時職爲保氏。不居以廣廈。曼忒農固有心計之人。旣據大權。防生媚嫉。故亦不易其居屋。雖與寢殿毗連。已落邊際。顧此小屋中。經國中第一人眼光所注。而舉朝之公卿相將。亦注目其間。於是司加龍之寡婦。已易爲曼忒農。候爵俸祿所入。及其湯沐之邑。埒於通侯。皆以承王恩。倖來也。且此小寢室中。王每日必至。一聞曼忒農語。心理語較諸大臣接膝陳奏。殊有趣味。王此時。以平日眷顧孟忒斯班之心。一一移注曼忒農家。卽朝貴人人咸知。王旨故亦隨風。

而靡爭趨曼忒農。是時朝士尊王甚。摯王意何嚮。朝士意亦何嚮。王趨教門。則朝士人人捻牟尼珠。爭誦聖經。王果悅樂部者。則朝士亦人人爲俳優。間有不識時務者。王憂而樂。王樂而憂。則仕途且立沈滯。弗進此等人。察言辨色。皆以逢君之惡爲能事。至亞摩雷之於曼忒農。平時初未交言。以曼忒農好深居。且不面朝貴。卽偶出。亦爲一赴禮拜堂。玉容微爲從官所瞻仰而已。亞摩雷今日從南穀至曼忒農密室。初面貴人。狀殊踧躇。不自甯謐。南穀旣引大尉至馬丹門次。卽曰。馬丹今日之間爾。卽問晨來事也。惟見時萬勿自明其宗教。馬丹平日仁恕。獨於異教。則深疾之。如仇讐。語後。微叩其扉。遂入。言曰。侍兒已延得大尉德嘉鐵納至矣。聞室中有和婉之聲。言曰。請大尉入此。亞摩雷聞命。鞠躬入屋。小如舟。惟較己之值廬。陳設略佳爾。顧物事雖無多。而嚴潔無倫。牆上所懸畫軸。皆關於宗教者。地衣亦樸素無華飾。帷幔皆作闇淡色。對之神爽。牆坳中有白石琢聖母馬利亞象。座前燃小紅燈。小几上陳紅錦裝池之聖經。狀乃不類繡闕。直一小小禮拜堂耳。龕之左右。有兩溫榻。以綠錦爲茵。

一以坐王。一爲馬丹便座。兩榻之中。有三脚小儿。上陳針黹之具。亞摩雷入時。馬丹不踞便座。則以面背窗坐。大抵王不臨蒞。馬丹恆坐此。以馬丹惡日光。故背窗面內。舉動端重中。卻含窈窕音吐。尤極清脆。貌非極美。而溫雅足以動人。額廣而白目巨。而光淨。設想其慍怒之時。而威棱亦足懾衆。第初面生人。喜慍皆不之露。與孟忒斯班。相去遠矣。至語言之工。孟忒斯班固占勝着。而曼忒農之溫淑沈靜。侍王晚年之性情。較之能言貢媚者。據勝着多矣。亞摩雷此時。亦無暇循聲辨色。及於細微。但有莊肅之容。面馬丹低首而立。曼忒農微睨大尉。初若不注意。然而壯士性情。已爲所得。馬丹徐徐言曰。大尉。吾前此似曾一見。亞摩雷曰。然。下走可數次侍馬丹。惟自顧凡猥。未敢冒昧。晉謁馬丹曰。吾惟孤僻成性。至朝賢咸未覲面。蓋宮庭之中。初非善地。有志者。恆自湛匿。而浮妄者。日喋喋於人前。可醜也。聞大尉曾從軍於外。然否。亞摩雷曰。下走曾轉戰於萊茵河。荷蘭及坎拿大。馬丹曰。大尉至坎拿大耶。孟忒里奧爾間。聞有嚴潔之女。冠居處地。前此有兩開士。一曰馬利亞。一曰惹安。修持之淨室。

此二人具大神力。能諱勸異教之徒歸於正教。而天兵所蒞。凡被痍傷。此二人咸爲將護。天兵者。吾法之兵。征魔鬼令服。則上帝之羽林耳。吾若能至彼間。助此兩善人。於鄙願已大遂矣。大尉自念。彼間女冠瀕於危亡。動息卽爲野人所殺。今馬丹身握國權。一舉踵可以糜爛法國。胡爲慕及彼人。因思南穠曾言。少談宗教。遂亦鞠躬曰。此二開士。至有德行。馬丹曰。汝曾見拉瓦而主教乎。亞摩雷曰。謁之矣。馬丹曰。彼間新教徒。仍與國教忤耶。亞摩雷對曰。圭白克中國教。昌孟忒里奧爾中新教。昌也。馬丹曰。汝平日詔汝之神甫誰耶。亞摩雷知難事至矣。但曰。下走無有也。馬丹曰。近人恆不用神甫爲導師。若我者。苟非神甫見導。不審迷途至何許矣。且爾命名時。神甫爲誰。亞摩雷曰。無之下走爲新教人。馬丹如遇怪物。二目中已露兇光。言曰。汝爲異教人。胡以在王左右。此甯非可危之事。亞摩雷者。初無新舊教之別。特以新教爲其祖父所貽。不能不率。今日忽見馬丹作此駭怪之狀。心滋不悅。因曰。馬丹聽之。吾新教中人匪特曾隸王羽林。前此曾有人御寶座者。馬丹曰。然以吾祖父曾爲大主教。

亦新教中人。曾爲亨利王加冕。此吾家故事。吾尙憶之。惟亨利王臨崩時。曾已改教。吾今亦願爾踵武祖烈。語已起立。跪於聖母之前。代大尉懺悔。大尉凝立至瑟縮。忽聞有彈扉聲。此聲一發。馬丹立時出靈界而入俗界來者。卽爲南禮。言曰。王方在得勝殿。更五分鐘者至矣。馬丹曰。汝行待王至時。汝更告我。南禮出時。馬丹卽曰。大尉侵晨有書上。王爾爲我上之否。亞摩雷曰。上之矣。馬丹曰。吾今日聞馬丹。孟忒斯班爲王所屏。確乎。亞摩雷曰。然。馬丹曰。吾聞彼於輦道中待王有之乎。亞摩雷曰。然。馬丹曰。吾聞孟忒斯班約王以下午相見。有之耶。亞摩雷曰。有之。馬丹曰。有數語。本不應問爾。惟吾方與大敵競所關非小。汝亦明我言中之旨乎。亞摩雷點首。馬丹曰。汝旣知之。試言其故。亞摩雷曰。吾從言中之意。知馬丹與彼人方爭寵於王前。馬丹曰。吾初不爲己利。上帝可證。蓋吾所爭者爲王靈魂中決善果。亞摩雷曰。以下走觀之。與前言初無判別。馬丹笑曰。王身體之險。有將軍輩以刀劍護之。惟王之靈魂。險巇之處。較身體之險爲百倍。今汝亦護王之人。吾故求助於爾。爾知王之往面。孟忒斯。

班爲時在幾句鐘。亞摩雷曰。勅言四句鐘。馬丹曰。汝功非細。吾決不忘報。南穀已入。言曰。王蒞矣。馬丹曰。大尉汝自別門出。勿與王遇。遂出一卷。贈大尉曰。此布素主教。所著國教大綱。恆人見之。恆自新而改教。吾亦願汝行之。大尉自別門出。然掩扉尙微睨屋中。見馬丹背立。以目視鐘上時刻。即啟鐘機。移其針倒轉而前。

第九章

亞摩雷甫出。王已入。馬丹起立。與王微哂。而爲禮。王踞便座。爲態甚憊。而額上有皺紋。似快快弗樂。馬丹哂而啟王曰。陛下今日弗適。詎臣所居室闔不見。日宸衷弗怡。抑或別有開罪於王者耶。王曰。非也。吾近爲主教布素神甫拉歇司。偏我不自聊。我直如鹿。二人竟類獵狗。長日朋謀動我。且歷言地獄險狀。及最後之判決。用爲虛喝。馬丹曰。是二人宗旨安在。王曰。彼欲朕御宇之時。所信誓者。取而毀之。此誓爲先皇所立。而彼一人乃欲令朕毀棄。盡驅新教徒出諸國門以外。馬丹曰。此特纖小之事。陛下何爲弗適。王曰。汝意云何。馬丹曰。凡王所弗欲者。臣焉敢趣。王爲之。王曰。新教

者汝幼時亦所信服得母有舊感於心馬丹曰無之今日良恨異端王曰旣與新教無復感情胡爲不令我驅之出國馬丹曰新舊之爭均上帝意果帝心所嚮則異端亦必仗神力使之改正陛下但託能於上帝何憂懲爲王曰汝言忒聰明爲吾百思所不能到明日見彼二人即以爾言斥之令彼不能更言試思此議一行乃大不利於國不能不加之以慎重矧此二人恒言火山劍樹震余言之故爲恐狀外史氏曰王及晚年他無所顧惟靈魂見困於地獄則王之大戒存焉故二人卽以是要之馬丹此時以輕脆之聲報王曰縱有火山劍樹王何必慮王非宗教中之長男乎王曰以汝言之吾不下地獄矣馬丹曰決不至是王曰吾生平固多誤卽爾亦恆引以爲言馬丹曰吾言王誤其事在前且人安能無過陛下近日避去邪慝之人此一轉念已足上簡帝心盡赦前眚王曰嗟夫設吾王后尙在者亦必知寡人近已煎滌前失矣馬丹曰然王曰王后如在亦當知吾之改過盡出爾力須知卿眞我之善安琪兒幻爲人形而親我且卿之好我而感我又何以貺卿因伸手與之堅握方堅握時

更欲力挽其肩而馬丹已莊容起立以手上指王卽鞠躬曰善吾知改矣卿且歸座復言曰卿更治針黹耶王引其花繡之端賞其針線而馬丹則時時偷眼辨王顏色言曰臣之所繡者爲王在風丹白露行獵之圖此爲走鹿此爲二獵狗張口而吠此爲衛士此爲命婦也且陛下今日曾御馬乎王漫應曰未也卽曰卿心乃冷如冰雪馬丹曰果能凝冷如冰者佳也今日陛下曾放鷹乎王又漫應曰未也卽復曰到底有人能動卿心否卿前此不嘗有夫耶馬丹曰臣對前夫亦直同看護之婦陛下試觀此中有人類公主否王不耐卽曰司加龍者汝亦愛之否彼年至老且嬖卽所爲詩亦嬖者之言也馬丹曰王勿輕其人臣感且愛之王曰卿之愛情卽如我者耶以我卜之或不至是馬丹曰王安能圖度女子之心直搗其祕處王曰無問其他但問爾究愛憐司加龍否馬丹曰勿論如何臣但自盡其分王曰汝玉壺中冰心曾亦爲愛情所動乎馬丹曰陛下勿更詰臣王曰究竟句馬丹立止之曰陛下幸赦臣勿再言此王曰我一生安樂卽繫是言馬丹曰王言令臣心痛王曰卿心能否有纖微之

火縱之可以燎原亦如寡人之耿耿者語至此王起立張其兩手作苦求狀而馬丹已迴面避王言曰陛下聽臣卽臣心愛王亦決不自陳於王前王曰卿何疑而弗言馬丹曰臣立志欲力引陛下靈魂上升帝廷陛下天分之高舍臣外亦無一人知者故不欲以兒女之情錮王之靈界王曰然則我之情愛初不屑於卿懷馬丹曰陛下擲無數年光於蕩人之身今王春秋漸高正宜清修以備上帝召對今所求者求王於耄期垂及時多崇祠廟以禮正神爲天下法式卽前有微眚亦可期諸晚蓋王太息臥於便座言曰嗟夫卿言較布素拉歇司尤烈也馬丹卽立化爲笑容言曰陛下聽臣臣非彼二人用意今日陛下降尊於此矜寵臣身臣仍以正言忤陛下則爲不知度量在理王明日應不貺臣以示罰於臣於律始協今馬婁宮工如何者彼間飛泉能如吾輩所言之尺寸否王曰飛泉良佳惟曼沙將右廂配殿規制稍後曼沙之能均余所教由旁觀之尙宜時加以訓辭今晨取圖已明斥之曼沙力承已過而去馬丹曰此改宜需財何數王曰可數百萬耳惟此一改制苟自南嚮觀之爲狀煥然

矣。今余於南嚮。已拓地一英里。以彼間均貧民屋宇。撲地如土積。不適於遠觀。故力令剷除。不聽。更疊御園之側。馬丹曰。陛下今日胡不御。馬王曰。安有味趣。前此余聞胡笳及馬蹄之聲。血皆爲沸。今則懼懼。不欲聞矣。馬丹曰。放鷹亦罷乎。王曰。吾後此決不更御。鷹坊馬丹曰。陛下終須得一樂境。王曰。求樂弗樂苦。乃彌苦。吾乃不審。吾當少時。值巴黎民變。時時不保朝夕。及先母后往往避難。樂乃無極。今混一區宇。無一星竊發之影響。且法國爲歐洲諸強國之冠。而朕又爲法國之冠。轉覺百無意味。試觀國中行樂之地。至多而朕嘗之。如噉螬。幾欲致曠。馬丹曰。眞樂乃在內。不在外。天下惟天良淨潔者方爲至樂。矧樂趣亦隨年而臻。少年胡得與。晚年比並。王曰。諒哉。此言直叩吾局矣。忽以目視門曰。誰在扉外。馬丹曰。殆我侍兒。因曰。南穀門外果何人者。南穀曰。麥歇考尼里。至誦書以娛陛下者。馬丹曰。是臣招之使至。臣本約拉信誦詩娛王。以拉信新墜馬。不能至。故易以考尼里。且陛下欲令之入乎。王漫應曰。聽汝所爲。南穀引手上指。卽見一瘦人。髮已斑白。鞠躬入門。與王及馬丹爲禮。後

卽隅坐於側。馬丹對此詩人。承以笑靨。而王已。厯厯欲睡矣。考尼里啟曰。陛下聽臣論古。欲得悲切之詞耶。抑欲得里俗之言。供天顏一粲。王曰。勿爲里俗之談。里俗之事。宜付之俳優。不能施之論說。考尼里鞠躬承旨。馬丹啓曰。陛下在歡樂之時。豈宜聞悲梗語。卽迴首謂詩人曰。陛下宵旰憂勞。汝宜以愉悅之詞。供宸聽也。王亦曰。可。故事固宜有風趣也。朕自摩里爾物故後。狎客供奉之班。所言未有能使寡人破顏一笑者。考尼里卽啟曰。陛下於詩中滋味。眞能判別於酸鹹之外。果陛下亦留心詩歌者。臣輩幾無噉飯地矣。王笑。王生平但樂諛詞。卽寓譏刺亦深美其能譽。已都不覺。考尼里曰。王之召對元戎。則面授機宜。指麾將作大匠。則規劃皆中於繩墨。至於訓迪臣輩。詩中滋味。風趣音節。一一皆足爲臣輩之師。陛下但發縱指示而已。而不屑自爲者。正以天神之尊。惡能與魔戲競其優劣。王大悅。曰。朕頗自謂於美術一道。殆出天授。非人力也。須知以藐躬管全國安。有餘閒及此。考尼里曰。陛下培植造就臣輩。即可兼小人之事爲大人之事。陛下之撫育臣輩。直春陽之煦草木。如前後。

詩家摩里爾波乙路拉信等均後起勝於前輩甯非陛下之功即如小名家司加龍之屬流品雖卑而聰明亦足取忽爾憶及卽自改口曰聖母馬利亞臣乃作何謫語馬丹方拈針即舍其針以怒目視考尼里考尼里大驚欲跌至不敢微舉其首王不省但曰汝試歌詩以娛我詩人卽承旨曰諾今歌大勒司故事聖意云何者王曰大勒司爲誰外史氏曰王之生平爲教會中人所壅蔽不令知前古史事防王心疑及教門暴曠之事故王之所知舍近事外一無知者唐時宦官之侍僕亦正用法若仇士良是也考尼里此時答曰大勒司爲波斯王王曰波斯何國又何屬者考尼里曰此爲亞西亞中古國王曰大勒司尙王波斯乎考尼里曰否此人在當時曾與希臘王亞力山大王對敵者王曰亞力山大吾曾聞之其人甚知兵考尼里曰其人同於陛下之文武兼資在國見戴於國人出師威伏乎敵國王誤卽曰波斯中乃有此文武兼資者耶詩人卽啓曰所謂文武如陛下者爲馬其頓王大勒司者波斯王也王不悅以生平初未嘗爲人更正卽曰似此悠悠古事汝亦未必了了且朕亦不樂聞汝勿歌是事可也

詩人曰。今臣歌僞星士可乎。王曰可。考尼里即背誦此故事。馬丹則自檢五色之絲。自治其繡段。王閉目仰臥於便座。若聞若不聞。馬丹時時舉首視鐘上針度。又時時竊視此。驕王此時鐘上已三點四十分。實則爲馬丹推回其針。以時刻覈之。已四點逾十分矣。王忽曰汝勿歌。是中大有誤。第三行中有出韻處。王平日自以爲能。不誤處。故指爲誤。而詩人亦將順其意改之。此時考尼里卽惶恐言曰。此詩誤在何處。乞陛下指示。臣之所以竊喜貢藝於御前。正以偶有所誤。卽蒙聖訓用以自慶。其得師王曰汝更歌之。考尼里復重歌之。王曰此第三行中不當出韻耶。汝胡不知。馬丹汝亦知其誤乎。馬丹曰臣乃無覺。且不知詩不如陛下聖明。詩人曰果誤矣。敬記聖言。明日於舊本改正之。王曰我不爲詩而耳聽至審。一韻之外咸不能遁。吾聽察卽雅樂。一道朕亦得諸天授。凡勒婁之有誤處。咸不自覺。彼在梨園中奏技。朕立斥其誤。尋合諸樂工評之。皆推朕爲知音。考尼里曰陛下言誤者孰能不誤。方更歌時。復聞有叩扉聲。南穠入言。宰相羅武乙面聖。王曰入之。復曰麥歇考尼里。汝奏技良工。惟

朕方有國事。與相臣言。汝止矣。明日少暇。舉爾所未畢之詩。更爲朕歌之。語時微哂。遣出之。王平日籠絡臣下。卽用是道。故人頗信。伏考尼爾鞠躬出而羅武乙已鞠躬入矣。羅武乙恃貴而驕。深不喜此小屋。且屋中人尤非所重。其貌爲鞠躬。心則鄙夷殊甚。曼忒農亦知羅武乙之不善。已則深沈不露其狀。亦僞爲恭謹。以接宰相。旣見宰相入。則肅然起迎。引手與之爲禮。言曰。今日小屋中乃生光采。陛下及南牙皆蒞。是間是間。家具不完。但能屈丞相坐此三股之小杌。若果有國家機宜。事我請間。以便聖君賢相定策。王曰。馬丹勿行。朕命爾居者。汝居之。羅武乙此來何事。趣爲朕言。羅武乙曰。適英國以使者至。言國中民頗囂動。將成內亂。書爲英相勝德蘭勳爵所寓者。問吾國家果荷蘭人助民爲亂者。欲乞吾國以兵力助之。不審陛下能否。允出此兵。然臣知陛下睦鄰之心。已回書言。陛下必允。王怒曰。汝回書何言。羅武乙曰。臣報言似陛下允爲發兵。王大怒。取鐵杵幾欲撲殺羅武乙。馬丹立起抱王。止之勿下。王雖置鐵杵。猶怒目視羅武乙。曰。汝惡敢專擅如是。羅武乙曰。陛下容臣自理。王不

許。但曰。汝報國書。乃不敢我宰相可謂有權。朕不嘗告爾。朕卽國家。國家我一人也。是間事。均朕主之。且朕所爲事。但對越上帝而已。餘人又安能與。且汝何如人。非朕所常用之器物耶。汝乃敢不。敵朕而遽自專。此時羅武乙驕恣之氣全銷。但有戰慄。即曰。老臣。自以爲事。陛下久竊窺聖意。故曲體而出之。王曰。吾置相。但奉行詔勅而已。幾令汝默窺吾意者。故事枚卜。均出貴胄。今朕破格用爾。素門爲歷史。所不見之族。望此何意者。正以貴胄好專擅耳。今朕用爾。輩其專。仍類前人。然則朕之破格用。人誤耶。羅武乙聽之。朕邇來窺爾。行爲每事。皆逾分際。汝知之乎。下此須自檢點。勿更冒昧。羅武乙旣經嚴譴。如卵之觸石立碎。則俯首至胸。無敢伸辯。王不懼者久。忽爾盡釋其怒。以王之怒來去無恆。卽言曰。羅武乙。英之使者。汝留之。勿趣歸。羅武乙曰。如聖旨。王曰。朕明日設朝。集大臣議覆書。以朕之意。大兵不能遽出。英人者。爲余茵上之刺。朕意欲兩強相持。令彼兩皆疲憊。然後以一旅之師。躡荷蘭。犁其庭。而掃其閭矣。且英國前此之內亂。爲期十年。今茲或踵前失耳。羅武乙。吾國開邊至萊茵。

河乎。羅武乙曰。大兵咸備。但俟詔旨。王曰。戰事甚糜費。朕此遭萬不能如前役。卽市其重器。儲作兵費。今度支如何者。羅武乙曰。未見其足。惟臣有良法。能令左藏充盈。今晨陛下不與神甫言。將驅此新教徒出英國乎。果盡驅新教之徒。則所遺產非國家有耶。且陛下亦可以財雄長於歐洲。王曰。羅武乙爾晨來議論。適與此反。羅武乙曰。臣晨來計畫未周也。王曰。汝特未與兩教會人商酌。今已議定。故來愚我。羅武乙聽之。朕蒙業承麻有年。累朝故事。朕尙未之知歟。凡建一議。立一謀。均汝輩熟商而來。未有猝發一謀。曾爲朕計其可否者。實告汝。汝輩所爲事。咸有罅隙可尋。猶之取鴛者。但迹墳土。至新教徒之應留與否。朕自加以權衡。汝輩無與也。此等人宗旨雖殊。亦上蒼所貽之赤子。羅武乙聞王嚴譴。直搗心坎。欲辨乃無可辨。因鞠躬曰。臣亦不忍陛下爲此。王張目視馬丹。言曰。我但知有一人。陳奏初無私意。其人亦不爲名譽財產所動。故彼所言。朕無不聽。語後。與馬丹微哂。羅武乙含憤側目。不敢更言。遂起立曰。臣適所言。但言其機。非必干王行之。今爲時甚久。臣出矣。遂與馬丹略爲禮。

面王則鞠躬至敬。遂出羅武乙行後。王曰：「此人鞅鞅無人臣禮。似此專權國家受病。非鮮。惟在中書。有年尚稱勤勉。不爾。朕已驅之出國門矣。彼無論何事。必決以已謀。卽如前日朕言。忒利阿農殿二窗畧小於別殿。彼答言以爲規制同也。朕嗣令勒奴忒。而以尺度之。果小於別殿。因曰：『鐘交四點。朕行矣。』馬丹曰：『啟陛下。臣此間鐘度緩可半句鐘。不能謂之四點。』王始愕然。旣而笑曰：『果漫至半點者。』朕亦弗行。行亦無及。果彼問朕者。朕將曰：『鐘漫非吾過也。』馬丹僞爲愁容。曰：『得母重事爲臣所誤。』王曰：『非也。』馬丹曰：『得母爲國事。』王曰：『否。』朕將於此時往而痛責一可憤之人。惟不去亦佳。彼知朕逾期不至。則足知朕之不善其人。噫。朕但願後此在宮廷中永永不晤其人。則吾生爲多幸矣。已而曰：『誰入此者。』此時門開。馬丹孟忒斯班入。作怒容。而兼媚態。立於二人之前。

第十章

馬丹曼忒農者。多急智。臨事恆不亂。一見來者。爲孟忒斯班立時起迎。張其兩手如

承迎摯愛之人。言曰。今日好事乃從天而降。非人所能逆料。孟忒斯班怒極。則極力自遏其氣。翕脣弩目。如火灼其心。二人對立。可數分鐘。一笑一怒。均法國中至美之。人。時孟忒斯班。弗視曼忒農。但以目視王。王亦不語。但側視孟忒斯班。曰。陛下。吾突來。驚聖心矣。王曰。馬丹。汝邇來太冒昧。無儀檢。孟忒斯班曰。吾來果冒昧者。幸王見恕。惟此地爲吾兒保姆所居。平日去來。初不必加以閑檢。曼忒農曰。果爲吾一人計者。馬丹來去。原可自由。孟忒斯班曰。吾之對爾在禮。母須通謁。王大怒曰。後此爾來。非通謁不可。朕實詔汝。對此貴人。宜有禮節。孟忒斯班以手指曼忒農。曰。此貴人耶。待之宜以禮耶。惟陛下命令。卽我之法律。須知陛下所指之貴人。吾乃不知其名姓。爲誰。今日爲曼忒農。前日爲風灘。其司明日。又不辨其誰姓矣。語時至挺拔胸前。忽起忽落。氣咻咻然。其尊嚴貴重之容。凜然不復可犯。王雖盛怒。心驚其美而已。微微降伏。蓋孟忒斯班之美。當其矯嗔之時。尤媚入腠理。王曰。馬丹。儘爾傷人之語。亦復何益。孟忒斯班曰。此非夙心。王曰。然則適所言者。傷人固已甚矣。孟忒斯班曰。陛下。

當知宮中之中。恆以僞言爲直言。爲僞臣之所言。直宜陛下之不悅。我王曰。汝止勿言。孟忒斯班曰。王固不悅直言。王曰。汝言當留意。汝今出矣。孟忒斯班曰。出可也。惟陛下晨來曾許臨幸臣家。且親允以四句鐘。至今是間。固足稱王之意。然以臣度之。必不以此間溫柔。遂忘晨來之綸綺。王曰。馬丹。我欲來。惟此鐘點緩至半句鐘。朕欲行時爲期已過。孟忒斯班曰。此莫須有事。即五點鐘亦無異於四句鐘。王曰。謝馬丹。此遭相見。足生余怒。不願更見汝矣。孟忒斯班曰。然則陛下不更幸臣家矣。王曰。然。孟忒斯班曰。然則晨來恩命亦不踐矣。王怒曰。馬丹。汝太唐突。孟忒斯班曰。王失信於臣家。王曰。勿許更言。此何如禮。令人能忍。孟忒斯班曰。臣亦殊不能忍。陛下聽之。臣愛陛下。亦不憚陛下。今行矣。請此女教士醫王之善心。惟陛下不好直言。臣行時。尙以直言相貢。臣知王失信於王后。又失信於外婦。此固可也。惟今日方知王之素行。乃甘於食言。已昂頭不顧而去。王跳起。如中巨棒。以平日初未聞是言。乃不知世界中竟有此佛意。事羞極而怒愈熾。以爲孟忒斯班妬曼忒農。此尙婦人之素。

行以二美爭一王。其事甚趣。今乃敢爲犯蹕之言。則大悖君臣之分。於是大吼奪門而出。曼忒農久知王意所在。則夙爲之備。一見王起。則立止王躬。請王自重。王曰。我不赦其人。馬丹曰。王行將何爲。王曰。驅出值廬以外。馬丹曰。王宜念句。王曰。何念之有。適所言何堪。朕非出治其罪不可。馬丹曰。王下一璽。書足矣。王曰。朕將面斥其人。遂啟關出。馬丹曰。陛下幸自重。勿褻天威。然尙竚門次。見王疾步而趨。旣不見王。則歸而長跽於聖母象前。爲王禱。爲身禱。爲法國禱。時亞摩雷自馬丹屋中出。卽領格林觀御河風物。格林評量優拙。均出之天眞。無復假借。凡僞瀑及人功之泉。在巴黎中。可爲壯觀。然格林在美洲已觀尼亞格拉大瀑。覺觀此人功所成。亦不覺異。卽纖草之場。至廣然。亦不敵美洲西部草磧之修。可數千里。惟耀日瑩煌。皇宮雕鏤之奇巧。結構之壯麗。實歎爲未見。言曰。吾明日待愛勿倫來時。將延入是間。使廓其眼福。彼意料中。必不謂一人所居。乃并紐約薄斯敦二城。尙不如其宏闊。時暮色漸起。亞摩雷將復入宿衛。乃以格林託大尉白里沙克。將護其飲食。遂入侍禁班。甫執仗立。

忽見王促步如飛而至。都無隨侍之人。天顏甚慍。忽曰。侍值武士。誰耶。亞摩雷進曰。小臣侍此。王曰。汝非大尉德嘉鐵納耶。晨爲爾班。夜復爾耶。亞摩雷曰。此爲第二次入值矣。王曰。朕今將有須於爾。亞摩雷曰。恭候聖旨。王曰。汝所部尙有人乎。亞摩雷曰。中尉忒來摩意方值便門。王曰。可以彼代汝。亞摩雷曰。如聖旨。王曰。汝可至麥歇德微翁家。其人汝識之乎。亞摩雷曰。識之。王曰。彼若不在值廬。汝必窮搜得之。以一旬鐘爲限。亞摩雷曰。諾。王曰。汝告彼朕有勅旨。六旬鐘時。以車遲宮門外。彼姊氏孟忒斯班。卽以此車流竄至百的堡。且告德微翁。若半道釋去。其人則惟德微翁是問。汝行矣。亞摩雷舉刀行禮。後卽出。王即趨入一華美之別殿。其中均黃金爲飾。鑲以明鏡寶光四照。凡陳設均紫檀爲之。光可鑑人。地衣則以土耳其亞里布城所織之氍毹。溫軟幾同野藻。中有黑種小童。衣銀絲之衣。司啟閉。王入時。卽曰。主母安在。黑童曰。剛歸是間。王曰。我欲見其人。黑童曰。請陛下恕臣馬丹似有句王大怒。曰。今日所遇乃多拂意事。遂力擒此黑童。擲之地。上直奔寢室。入孟忒斯班所居處所居。

尤壯麗於前高窗上接承塵下及地衣奩以粉霞之絹爲之斜陽臨窗竟呈嬌軟之容牆上筭黃金燭臺每燭臺之後反映以巨鏡遂覺滿殿通明成千門萬戶矣承塵上則爲名畫師婁白倫手筆狀王爲尤彼得大神與仙姬款語狀帷幔茵褥一一皆作粉霞時晚照已微金蓮炬上此寢殿中乃大類蚌殼珠母射光照人者似繁星之區逾於仙人窟宅屋之深處有溫榻一區孟忒斯班以玉容伏之枕上玉臂下垂寶光燦然秀髮四披其肩蝤蛴之領照耀髮光之中乃類象牙直名花經雨垂萎於畫闌矣顧一聞推扉之聲則已起立旣見爲王卽奔趣王前伸其玉臂荀淚於眶令人哀憐不能自己帶淚而露笑容稱曰陛下適臣冒犯天顏誠萬死陛下何曾爽約於臣者陛下之爲此狀迨略試臣心之堅與否非有他也臣奈何蒙萬死而唐突陛下且臣尤何忍令聖心有幾微之弗適噫臣知之矣陛下此來爲赦罪來也遂以玉容就王冀王親吻王卻立以手麾之言曰朕與若恩愛之期過矣爾兄弟以車在便門六旬鐘延汝至百的堡汝至時澄心悔過朕或有後命孟忒斯班大哭如受巨棒

卽含悲言曰陛下甯逐我耶王曰以汝所爲安可仍居朝列孟忒斯班曰宮車卽晚出耶陛下之心安忍爲此以臣決之萬萬不至於此王曰朕命汝行即爲天憲汝恃寵而驕朕更不能再覲若面歐羅巴各國名王并而爲一尙不敢言爾所言汝何人乃敢辱我試思我魯意也王也奈何見辱此等無禮甯可容爾至於更赦其第二次前此吾尙姑容今茲母乃太過汝以爲朕平日容汝可刦而侮之且謂朕加爾以寵幸卽視朕爲平等朕非木偶不能婉轉隨人汝今日知過矣六句鐘時汝永永出非色野矣語時眼光四射挺立不撓馬丹以首自枕其臂左手微伸似避王而求王勿怒者含哭言曰臣知罪矣王曰苟知罪者可云尙有天良馬丹曰臣乃不審胡以竟有是言則此舌應生瘡痏且臣自承恩以來一身均沐雨露乃以頂上之福星竟敢加以非禮陛下今幸憐無依但依陛下再赦臣矣王此時意動且見孟忒斯班百種可憐而驕蹇之鋒因之小戢且思凡沐我恩膏者無不曲從號令獨是人倔強今亦折服朕躬於是怒氣全消然尙支厲言曰馬丹勿更呶呶茲事朕已熟思非決之

一日惟汝今日作如許蹇態直逼朕實行其事汝今日決出離宮矣馬丹曰出此可也惟必乞王恩綸赦臣之罪王一怒時臣躬脆弱殊不能載但覺如崇山下壓弗能自支且王此次嚴旨非貶臣也直同行戮惟乞王念臣十七年之恩愛脫我殊刑須知臣之侍王絕其親夫汚其名譽惟忠事王躬臣旣空其百凡王尤當恕臣一眚語時竊視王面王亦淚落如縗馬丹自慰曰彼哭矣我得生矣然微語竟爲王聞王立拭其淚抗顏言曰馬丹誤汝不生也汝王固閼弱可以凌競然不如是不足表朕天恩惟今日汝赴永巷所戚戚者以爲得罪聖躬天良不能自諧朕今赦汝往即爾所爾之寸心或能自慰見赦於朕也須知朕身臨萬乘賞罰一本大公咎乃由爾之自取且朕之加恩於爾邇時聖德尙未日躋今圖晚蓋不能不施由爾始馬丹曰聞言益滋心痛王之言此似傷耄期不知王之聖壽正在盛年臣平日聞人言王春秋高行事不同少壯臣以爲此語當言之於二十年後今何時也乃有此言王大怒曰誰言朕耄馬丹曰此語特臣不檢而言實則無人言此王曰汝言殊吞吐果孰言余耄

者馬丹曰無之王曰汝適不言吾耄而易其常耶實則朕悟道時至非耄也此言胡來馬丹曰此均不經之談王何爲聽之王曰此不經言耶然則朕固耄乎且爾與朕相處幾二十年汝相朕何如者馬丹曰以臣觀之王之天顏與恩意與臣當時初進御時同也王笑曰卿亦非老惟與卿尙以分手爲長策馬丹曰但臣此去能悅王心者卽身首異處亦非所惜王曰汝言當矣良臣職也馬丹曰陛下旣定臣辜請明示其處或荒蕪或古堡如陛下所命無敢違忤實則名花旣不能身被春陽卽萎頓於荒煙蔓草亦何所斬蓋臣之生命但有承恩時之十七年餘年均可謂之死旣使經陛下流配亦一無所思但思此十七年中王之恩幸嚼之若有餘甘且十七年中王之愛心但我一人承之旁無雜與之人今已別願陛下勿以臣爲念專享深宮之樂勿爲無稽之言所動王之行樂爲期長也陛下珍重臣行矣語已立暈於地王力抱之懷中馬丹卽以首枕王之肩嬌喘細噓王臉際髮香直撲王鼻王以手按馬丹胸際躍躍然如甚悲梗二目堅閉櫻脣微張露一行編貝之齒此時二人之面相距

未及三英寸。忽見馬丹星眼微張。向王作乞憐狀。王神志喪失。以口親馬丹矣。親且不已似王之盛怒。乃類秋風掃葉。一時形迹都渺。馬丹曰。陛下臣今安適者。王曰。卿勿行。惟後此慎勿辱我。馬丹曰。後此敢於一分鐘中令王不樂甯死勿有他念。惟臣不面陛下久矣。愛心勃發。致有此蹇而彼女。王曰。誰也。馬丹曰。此人臣亦不敢輕詆。以王命使臣致敬。其人臣安敢忤旨。蓋臣所言者。詩人司加龍寡婦也。王曰。爾二人幸勿不睦。教朕左右爲難。馬丹曰。然則王今日居臣家矣。語已。卽以手抱王躬。弗釋。左右凝視。久復納之懷。中言曰。親愛之陛下。今萬不去臣矣。此時紅燈已上。宮中色色皆作粉霞。美人如花。當王懷抱。又宮漏沈沈。四無人聲。並諸景物幻作溫柔一鄉。酥玉形骸。令醉王亦不期臥於榻上。言曰。今日不回寢殿矣。馬丹曰。東門之車。如何。王曰。卿勿念。朕殊不足對。卿幸。卿見恕。趣以筆來。朕立收成命。馬丹曰。陛下卽此作御筆。臣亦過別殿。作書得意之色。至復飽滿。此一場絕大之戰爭。居然獲勝。則得意臻於峯極矣。馬丹用粉匱之箋。書曰。果馬丹曼忒農。有書上陛下者。可寄至馬丹。

孟忒斯班值廬書竟並王之赦旨令黑童將出

第十一章

王自是日起沾戀孟忒斯班宮。無有間斷。每日行事如恒。事畢必至孟忒斯班家。以此之故。舊所服深黑之衣。至是亦少更顏色。冠上加鑽。行路亦少弛。莊容持行杖。時亦前後搖動。如少年示人以弗老。須知馬丹得勝之由。實能造飛語。謂王老耄。因之自死中得活着也。王旣學少年而朝紳人人亦咸盛服。早朝之時。衣飾仍燦然照眼。不爲寒素之狀。諸大臣中。前此所製奇服。方以王講道不敢着。以朝參今茲人人爭開故篋。易新衣矣。王三日不蒞禮拜堂。堂上但有神甫一人。對空榻而論道。一時跳舞之會。人乃如海。孟忒斯班寢宮中。男婦雜沓。各致所求。曼忒農家門可見鬼。不特羅雀也。方王講道時。凡浮妄少年。一時戢足。至時復通門籍。衛士莫敢致問。此時人宗旨悉變。惟布素及拉歇司。岌然無動。此二人者深知王心無定。卽爲此態爲時甚。暫無足慮也。尤知苟以危言動之。則恐死之心萌。仍復入我圍範。二人相約少待。

勿躁。於是神甫及主教晨至曼忒農家。而曼忒農座旁方置地球。緣授梅恩公爵。土魯斯子爵。地理之學。土魯斯之不嗜學。曲肖其父。弛不教。又酷類其母。曼忒農。仍以和婉之容。靜細之心。並此不可陶冶之頑童。亦與之融洽。此着孟忒斯班。則大怒。謂魯意王固昏耄。暨此女巫。顧吾二子奈何。亦屏棄繁華。湛溺茅菴之内。時馬丹見二叟至。卽遣去其徒。恭謹延二叟坐王及己之便座。則自踞三股小榻。侍此二人。數日以來。王不臨幸。馬丹亦形消減。第沈靜之容。一無所改。布素引目視馬丹。曰。吾女似大有憂。馬丹曰。然。昨夕禱告通宵。願上天開濬。王心俾勿沈迷。於聲色。布素曰。吾女勿憂。在他人覘之。謂爾恩光已逝。若以道人慧眼覘之。乃大異於常解。以道人卜之。更待數日。或數禮拜。舉法國之人。又將迴面視汝矣。曼忒農似未之信。言曰。吾所憂者。非爲寵幸之故。在我何求。且無意於攬權。而希寵。但願居一小室。足禮天主。足矣。又得數金。足以自贍。尤爲知足。惟所省。省者非爲失寵。吾之視此事。猶所拈弱線。偶成一結耳。何用憂爲。惟憂王爲滋甚。夫以王狷傲之心。如健鵠。奇鷹。乃爲凡鳥。

所懲不能奮其効翮故吾累日祈禱旣爲王並爲法國無他求也神甫引目視馬丹久曰吾女聽之汝言雖如是然尙有攀高之心馬丹曰神甫言然但願上帝鑒臣之心勿生妄念足矣當時王寵隆時加吾以五等之爵吾峻卻之賜吾金吾奉還之以國事下問吾謝不敏神甫試思此念何名攀高神甫曰在心然吾女幸勿以爲有罪此無罪也汝心非在濁世中攀富貴也汝之愛王直愛王之靈魂馬丹謝曰此夙心也神甫曰此卽攀高之意吾言中乎汝心非欲張吾宗教周貧乏挽惡人納之爲善之途尤願王爲萬善之首以表率天下耶如今助王興教一出於爾爾詎無此心耶汝至彼時天良將告爾曰救法國者汝也馬丹歎曰此一着直吾禱祀所求者神甫曰茲事汝願爲之乎馬丹曰何事吾力又安能至布素附耳言曰吾女吾實告汝吾二人欲令爾愛王此事乃大關於宗教今爾我所言更無他人與聞者我皆神甫汝有隱衷可恣言之吾問爾一言汝亦不能自脫汝不以書遺王耶馬丹大驚目主教面赤如血布素曰汝愛王乎馬丹曰主教弟子焉敢既而左右視主教曰吾兒愛情

非羞惡事可質言之馬丹曰有之惟未與王言也神甫曰汝將以何時與王言馬丹曰我意終不之言神甫曰吾兒此事當熟思之天旣與爾以情愛固有所賴非徒然也凡人之情直同蔓草匪特無用而地脈空爲之耗損似爾之情則鮮明之花華色芬臭均佳且足以庇宗教及於社會馬丹曰吾亦私恨情根牽纏甚願上天庇我去其魔障神甫曰非障也正也汝宜培植而長養之後此王若幸汝苟有子飛之望汝不宜拒蓋汝能嫁王則王之靈魂亦可上託帝力拯拔國教亦因之以昌故余願勿自羞澀誤此良緣馬丹聳然視此二人言曰神甫所言是何言者神甫意殆欲我嫁句神甫起立曰吾女老夫之勸汝行此初非有悖於教律正以此着大係屬於宗教故請爾嫁王馬丹惶恐言曰嫁王耶神甫曰吾教中希望卽在此着吾之視爾爲第二之惹安達克法之國家及王均須汝力振拔馬丹復歸座似有所思久之言曰神甫此事安能至天下成事須審其力所能至若不能至不如弗圖神甫曰汝胡知事之無成馬丹曰神甫曾於歷史中考外戚列傳曾以九五之尊下儻婦耶且以歐

洲各國公主爭欲偶王。王尙弗屑。足知正位中宮者必出天潢爲正神。甫曰似此難事。均可以計成之。馬丹曰卽王見允然於國家大計。亦不能不加籌度。故事王之冊立。王后必娶諸大國以爲榮寵。且后之來亦必有采地足以增大版圖。而吾則但有一針黹之合耳。語已微笑以待二人辨駁。神甫曰吾女安能無奩資。奩資即爾天授之聰明。及其幹力耳。王富有一國。胡待贈嫁之資。至爲國家大計。言汝一事。王能濬。王之心思。百度爲之維新。其受益良非淺鮮。馬丹曰果能至此。吾何靳焉。特王之左右親屬。尙有東宮及親王。定不吾許。必以直諫規王。此事胡可成。直虛望耳。神甫於前此之言。均談笑答之。惟語及太子諸王。則頗躊躇不能遽出諸吻。旣而曰。此事聽我教會中人爲之。吾輩自問均有大力足以動王。雖左右親貴足梗吾事。然吾輩以道德勝之。則親貴中尙未必力能加我。惟汝意須堅定。吾教會中正爾。託汝爲命。馬丹曰神甫勿憂。吾有徑寸之氣。卽足爲聖教宣勞。神甫曰汝能以玉容助教會振興。則余亦將盡其願力助爾成事。馬丹曰吾効勞於教會。實生平之宗旨。神甫曰佳哉。

汝後來既爲道人高足爲法國主母爲教會干城三美具矣馬丹曰所願亦正如是神甫曰此事決成汝亦知國中一日不劇異端則正教亦皇皇然日有所懾譬諸佳果着小霉斑不急去之果身爛矣馬丹曰身旣嫁王則神甫之命處此新教者將如何神甫曰驅之令盡山羊安能羣彼胡羊王心近已兩歧矧今日羅武乙又爲吾輩所動但得汝能助順則教門大勳集矣馬丹曰新教人多奈何神甫曰惟其多也必加斥逐少需患且立作馬丹曰無分良楷驅出國界不幾成爲無告之流民耶神甫曰咎由自取彼患流離者一歸國教卽安如磐石胡乃不爲馬丹曰語固近理第心至弗忍於是二教主大不謂然蓋力爭教派遂盡斂其平日仁慈之心權宜行其肅殺遂言曰汝乃左袒上帝之仇讐耶馬丹曰果爲帝仇吾亦何愛神甫曰然則此種人非帝仇乎吾亦知爾先世亦出新教此時心有所戀正未可知馬丹曰非也惟新教爲祖父所歸仰一旦盡之吾手心滋歉然神甫曰若祖父已有罪矣今爾心亦頗疑貳詎國教不應昌耶實告汝教會中命爾以事殊爲曠典汝乃敢峻拒而弗受汝

欲教會助汝在禮汝當少償教會馬丹此時起立言曰神甫之識力本高於我今出話本之大公果可以使我効力者請一如神甫言神甫曰此言足爲據乎馬丹曰可二教會中人咸以手向天言曰今日乃爲有福之日後此法國子孫獲天之佑永不忘汝矣此時馬丹坐而凝思冊立後應爲之事應享之福蓋馬丹攀高之心固所夙具今日乃悉爲神甫發之然亦但思得王寵眷國事與商初乃不期於正位今忽得教門之助居然爲天下母喜乃出諸望外馬丹亦自信願力至偉足以駕馭法王今居然有中宮之望則立誓匡王以正勿近邪侈尤不願踵先后之後巽懦無主今當決爲惹安達克拯法國並匡法王思及此心躍躍然動不已方其得意時則又轉念曰此何如事胡能遂意亦虛期耳顧此二教士究有何力乃能動王方其疑慮之時神甫已覺即曰吾女吾教會中人尤人以事無不立辦但爾事成時亦須趣爲教門宣力馬丹曰此事已許神甫矣神甫曰然則吾行吾事汝但靜聽好音馬丹曰諾神甫曰吾晨來語王王心頗惻怛終竟天良未泯一觸輒動道人當乘此時爲教會驅

其蠭賊余今將面王矣更與之言王必臨睨爾家果吾謀不中者則可謂枉居宮省二十年也今行矣雖未即晤面然吾力所致效之故汝當立見二人遂與鞠躬而出馬丹仍獨坐凝思不已一句鐘後消息渺然更一句鐘亦爾右手拈鍼初不刺繡但有此望似色子已投而梟盧未決時已曛黑馬丹尙堅坐未起時聞門外足音即爾愕聽已而過矣究非王也已而有叩扉聲其聲甚厲馬丹之心躍非常不期亭亭起立門啟則王至矣馬丹曰陛下臨睨且少俟臣請以南禮然燭侍王王立閉其扉曰勿進侍兒今日相見宜在暗中朕不能禁爾眼光中之示貶汝口中初不言朕過也馬丹曰臣焉敢督過於陛下試思此何如事詎臣妾所爲王曰朕前此去爾家時決計行一佳事孰知後此不能自決事乃立廢且爾累累諫余黑闇竟不汝聽馬丹曰何人無過矧陛下知過立改臣聞之旣悅且痛徹於心王此時立於爐次以手自捧其額微聞其嗚咽聲知王哭矣馬丹則盈盈而前引王之袖止王勿悲王卽力挽其手馬丹亦不之拒王曰朕非卿者不復成人今日寂寞如處萬峯之巔顧無一人

爲伴汝試思孰爲吾友孰可託以肺腸吾法此人則偏袒教會更眷彼人則戀戀妻孥朝士半多爲已獨有卿心則專注於朕卿乃朕心之善安琪兒也神甫對朕言與卿近者與惡遠至哉言也卿試告朕汝究愛朕否耶馬丹微語曰臣奏陛下匪但經年王曰卿言朕亦度得惟必得卿一言爲質朕亦知爾心視富貴若太虛之雲屬意在寺觀不在宮廷然能否爲朕少留作朕股肱卿能爲吾妻乎馬丹自念時至事集矣然力加沈吟不卽答然沈吟之時至促王既不能少待卽曰究竟卿能許我否聲顫而悲馬丹曰願上帝能使臣身無忝厥職則可答王臣今誠告陛下決計以上帝所賜之歲月無時無刻不令陛下安樂此時馬丹下跪王亦堅抱其手與之同跪言曰朕亦立誓必以上帝所付之餘年永永屬心於吾妻不更有第二人亂我情款於是遂立同心之誓然此二人誓於暗室之中幸到底無有違忤也

第十二章

方二人私語之時竟爲南穠所得神甫於王行之後隨而跡之一聞南穠言二人有

夫婦之約則立時傳布於外。神甫之言一出，舉朝之人咸知孟忒斯班敗矣。王心已向曼忒農，且有冊立之信。誓明日早朝舉朝皆互相論議。王旣歸自禮拜堂，而非色野離宮，人人皆議是事。五色之衣、雞翹之冠，立時納之。匱中灰色之衣襦復布滿朝列。神甫之對空榻論道可一禮拜。今日則堂中一無隙地可以容人。日中時，國人盡知獨馬丹孟忒斯班懵然無覺，但延躉王胡不來，然恃其驕跋不出，問人故，外間事一無所知。間有不得意人，將以消息告之。惟王心多變，又防死灰復燃，則功名係屬不如保身。緘口爲上，魯意獨斷獨行，以舉國之力自益，其身初未嘗爲人設想，亦未嘗計及身所行事。諸王太子敢進諫於前，是日腓力親王進求獨對，肅然而起。王見之大異，親王之貌不類其兄，軀幹少卑，而風格亦不如王秀麗。親王肥碩，行道紆緩，假髮披滿其肩。王衣樸素，而親王則絢麗如故。制寶星及徽章，一胸都滿，右手執冠與王鞠躬。王笑曰：「麥歇今日胡乃不樂？且似有慍色。」詎邸第中有反目事耶？且爾與馬丹想當無恙。親王曰：「仰託天恩，皆佳。惟臣之妻子有不樂事，悉如臣心。」王曰：「何也？」

親王曰。臣以誠事陛下。曾有虧臣子之職乎。王拊其肩曰。無也。腓力汝固助予者。腓力曰。臣旣重於陛下。則陛下尤不宜辱臣。王曰。腓力朕安有是。腓力曰。以臣觀之。陛下之處。臣亦不能無辱。臣與陛下託體先帝。即所論娶。亦皆貴胄。先后爲西班牙公主。臣所娶爲巴法利亞公主。顧臣妻已降格偶小國。然猶不失爲裔胄。且結髮之婦。爲英國公主。乃今日聞陛下欲冊立一殘廢詩人之婦。以母天下此何理者。王大異。繼而大怒。曰。腓力朕適許汝。謂盡弟道。今知所許過矣。汝今乃評量朕所宸選之貴人。腓力抗言曰。然。王曰。汝有何力。敢與乃兄抗撓。腓力曰。臣與陛下同胞。實爲家門支柱。王大怒。曰。庶人爾。尚不自知國度。以內朕爲天王。且萬水之源。衆流皆由朕出。耶。人人貴賤。均朕所主。朕貴而貴。朕賤而賤。但許其人。即可立貴。即使朕欲選一燒炭之婦。旣愜朕躬。爾親貴大臣。即當以望見顏色爲榮。汝尙未知耶。腓力曰。未也。惟此事。深以陛下爲辱。臣且辱臣妻。王曰。辱爾妻耶。彼巴法利亞之伊里莎白。朕亦禮重其人。然馬丹曼忒農。先世亦與先皇有魚水之愛。爾妻之貴。爲能尙彼耶。已矣。此

事不與若言汝第出可也後此能尊君親上者許爾入面否則絕爾屬籍矣腓力曰無論如何臣夫婦決不稱之爲后王欲毆之而腓力已逃然王今日乃不如往日之意得矣親王甫出忽入一少年似從遠道歸者周身均塵土白皙髮作琥珀色貌至肖王惟鼻梁微創王初見尙喜及見太子進而俯伏於地則立易爲怒容太子啟曰請陛下出臣一家於羞辱立后事大請陛下再思而行王躍起徘徊屋下言曰吾弟已抗我汝爲我子又喋喋矣意豈若季父嗾爾使前耶太子立而奏曰臣未見季父臣方統兵鎮摩爾登一聞此耗馳馬歸朝乞陛下免此家禍王曰魯意汝乃敢無禮太子曰臣焉敢者請陛下念母后果後母爲彼人得母貽譏於萬世王曰勿再抗辯婚姻之事庶民尙足自由朕貴爲萬乘乃反遜於百姓果敢爾者父子恩禮斷矣太子曰惟陛下冊立國母非陛下一身之事事關臣之一家陛下臨御以來功業冠乎百王爲包本王室至榮至顯之事萬不能以此區區者隳其勳名臣泣血陳請敢萬死求陛下收回成命王曰汝言乃類狂易今所欲娶之人爲法國名門之後推爾所

言。乃類凶醜之遺。汝竟何見。輕此賢媛。太子曰。彼父及兄。皆不愜於宗國。彼夫爲癟廢之墨客。卽彼在供奉之班。亦保氏耳。太子言時。王已頓足不止。及聞保氏二字。則大怒。卽曰。汝敢以吾子保傅視爲微賤之人。朕謂國中高貴之人。無如此媛矣。汝卽速歸。鎮所勿得更持黑白。待上帝命爾。爲君時聽爾。獨斷今朕爲若父。並爲若君。足以壓力。鎮汝矣。太子鞠躬無言而出。旣至殿門。又回面曰。陛下今佛乃龍長老。亦候旨殿門。不審陛下許之入觀否。王餘怒未息。卽磨手曰。汝行。汝行。太子方出。而頑瘦之老教士入矣。以此教士常常入宮門。故朝儀嫋雅。王見長老。卽以怒容迓之。曰。佛乃龍長老。何事見枉。長老曰。陛下逐事問及道人。有時如道人策行之咸有效驗。王曰。今何如者。長老曰。道人近聞飛語。聞陛下自處於阽危之地。此時道人亦宜有忠讐之言。上之陛下。王曰。汝洋洋作繁縟語。本意乃殊。未明朕今爲汝言之。殆爲浮言。所動。斬朕不冊立馬丹。曼忒農耶。長老曰。道人亦禮重馬丹。較諸他命婦爲甚。王曰。然則道人與朕同心。朕之行冊禮。汝當首肯矣。朕滋冒昧。早知道人爲我而來。則朕。

將傾吐其心曲告汝長老曰道人尙有一言王曰長老朕果有疑者必告長老茲事不疑何復待問請長老早安圖再相見此時王內斂其怒但以嚴冷之色堅爲飾非文過之言較之盛怒爲尤難入長老生平雅有權謀至此亦無能爲力卽鞠躬而退顧長老雖行而諫者尙續續至羣臣揣知王心謂能繼諫不已者王或見從於是宰相羅武乙亦進王曰羅武乙汝來詎有大事告朕羅武乙曰國中有一巨變臣專爲此而來取王進止王曰何也羅武乙曰卽陛下立后事王曰汝不悅朕所爲耶羅武乙曰臣但知忠於陛下不願陛下有此過舉勢在不能不諫王曰汝退朕何如主乃爲汝輩玩之股掌之上羅武乙不行王大怒曰朕趣汝行汝不行耶立趣其前勢將用武羅武乙拔劍王卻退大震然而羅武乙則自迴其鋒向己以劍柄授王長跽於地敢曰請陛下以此劍洞臣胸臣萬不能目擊陛下以蓋世英名付之塗炭王力擲其劍曰汝輩多方定策偪朕至於狂易耶試思古來人主有人爲臣下所迫如朕今日者耶須知朕之爲此特一人之私圖無涉於國之治亂汝聞朕言乎后雖立不與

朝政此事爾當知止。羅武乙起立納劍於匣。言曰：然則陛下策定矣。王曰：決不之更。羅武乙曰：臣職已盡，萬不能更語矣。鞠躬出殿，狀至弗悅。然心中則頗悅，謂王許以後不與政。王此時經無數臣工規沮，雖皆屏卻而心滋弗適。以王自念，出言爲憲，彼人烏敢抗方？快快問神甫已入。王頗以厲色待神甫。神甫與王道晚安，並致賀忱。言陛下冊立賢后，不惟今生之福而餘慶，且及來生。王曰：此何福何慶？朕今日爲人所忤，爲有生所未經之恨事。汝知今日舉朝之人，均長跽吾前，求收成命乎？神甫曰：幸王有剛斷，不爲流言所動。王曰：朕決不動。此流言惟自計親貴大臣及於子姓同聲。一辭余亦頗戚戚。內咎此事，苟非朕明斷，出諸天授，爲其所動，決矣。神甫曰：臣所以服陛下神明，能獨斷也。今魔鬼知王欲歸正道，則多出其爪牙引王不令自進。王不悅，曰：神甫所言乃以朕家人爲魔鬼耶？須知今日抗言之人，一爲親王，一爲太子。此外二人，一爲佛，乃龍長老；一爲首相，豈盡魔鬼之爪牙？神甫曰：惟其來者爲陛下所必聽之人，足見陛下神力之旺。在理。陛下必得聖教中之福，果永永受釐於天。王曰：

朕亦第憑其天良行事可行則行。今日黃昏汝更來此。此時朕尙須恭默一思。神甫退時心甚危悚。防王之變計知此時親貴大臣極諫。王雖不允而心則微動。設更有數人入諫則成敗正未可知。然諫者固尙有人。今惟以奇竦迅捷之手段始能收其效果。少需且立敗神甫既出卽過配殿而布素已佇於是間。神甫卽以所謀白之。布素二人遂同蒞曼忒農所居地。此時馬丹已去其黑衣。衣白錦之袍。挽其螺髻。加以金鑽之簪。他狀如故。馬丹之貌旣美。略爲修整容色。益麗。二教士見貌彼此潛思。我二人道德固不足動王。顧有此美人足以贊助教門之道德。且爲動人之利器。馬丹見二人同入。頗有快快之色。疑有變調。卽曰。二公之來得毋將得惡耗來耶。主教曰。吾兒惡耗固無而仇家亦不能不備。凡此等人力足動王即可敗吾之事。馬丹曰。主教殆未知王固與我立誓永不更悔。以理卜之。王必不食其言。神甫防馬丹信王懈於備豫。則出激語。聳馬丹卽搖首言曰。吾仇滋多。凡人安能自晨及晚飽聞謠間之言。而勿動。即使甘爲之事尋樂。未得而被愁。已多此何可者。此時惟馬丹力能擒王。

以速爲上。馬丹曰：神甫詔我以何謀？神甫曰：婚禮從速，則萬喙俱泯。馬丹曰：咄嗟胡能及神甫？以理卜之，以今晚成婚爲上策。馬丹曰：此言殊唐突。王心胡能草草？神甫曰：吾非謂汝於王吾力能使王干爾。馬丹曰：此又何能？神甫曰：吾力能以術驅駕。陛下今惟舍正道而用權術，足見教門之力量。迨大禮已成，則舉朝尙何言？說馬丹曰：神甫以何術趣王？神甫曰：吾術蓋以退爲進。王不嘗允娶爾耶？爾今日當面王而辭婚馬丹，失色曰：辭昏安可神？神甫曰：此爲良法。其效如神。馬丹曰：神甫命我於經月前，或一禮拜前爲之尙能。今夕强我言此，我心欲碎矣！神甫曰：汝勿患我之詔。汝安有失策？汝今私覲言曰：聞陛下以臣之故，備諸苦惱，臣萬不能以一女子之身令親貴大臣爲臣一人而間。今請陛下識其昨夕之誓詞，俾聖躬無見撓之時。臣身亦得藏羞之地。馬丹尙卻顧曰：行耶？神甫曰：決行之不可再誤。馬丹卽披長幘，語神甫曰：我已如尊命，以神甫之見較我爲高。王果如吾請者奈何？神甫曰：決不中變。馬丹曰：險哉！神甫曰：不險。胡得夷吾女趣行上帝賜福爾躬也。

第十三章

王尙居寢殿。思日中拒諫事。忽聞有微叩獸鑑之聲。一舉目已見心中思念之美人。燦然立於銀燈之下。王踴起喜溢顏色。在理馬丹見王之笑。宜足慰情。無復疑慮。即曰卿至此耶。不圖今日竟得一意中人見盼。汝果爲朕意中之第一人矣。馬丹曰。然則王不樂竟日矣。王曰。然卿又惡知吾意。彼親貴大臣爭來止我。欲令背誓食言。吾安能樂。馬丹曰。臣尙有良法足以醫王之慍怒。王曰。是何良策。馬丹曰。臣意惟出此離宮。請王勿憶昨宵之信誓。則諸臣安陛下適矣。且臣之願奉陛下衣裳。本擬求王一日之適。今如是甯非自悖其意。今請王爲臣指定一菴。俾臣得容蒲團。勿苦累王。至是王顏色慘變。手顫引馬丹領巾。一似曼忒農立逃。引之不令去者。蓋王之屬心。曼忒農。非復一日。每遇不適之時。必至而求計。卽前一禮拜眷顧孟忒斯班。而中心間實戀曼忒農。本擬冊立。曼忒農後。時時垂青於孟忒斯班。一身周旋於兩美之間。今聞曼忒農將告別。則大驚不知所措。卽曰。卿所言者戲歟。唯知汝不如是。決朕。

且此語又安可戲者。馬丹曰：臣之舍王心亦奇痛。唯仍處宮庭使陛下不安於骨肉之間。則臣心爲尤痛。王曰：朕王天下者也。詎吾行一事乃不能自主。卿萬勿去。我必留卿於此受天下之養。語時至訥訥。且力禽其領巾。防其飛越而去。王平日屬心且已信誓。今日聞彼告行。烏能不動。馬丹知王心至堅。遂出其第二策。啟王曰：陛下卽欲拔臣於泥滓中。而婚禮尙屬悠悠。片晌之間。不審王之聰明。又將受幾輩。呶呶試思。聽王受此磨折。臣心能釋然無憂耶。王曰：胡必悠悠。速行婚禮。不甯可耶。馬丹曰：無論速否。斷不能於一二日中倉卒而成。但此一二日累王臣心亦形志忑以臣策之。不如舍臣出家爲長策。王曰：此萬不可。朕萬不舍卿行汝。謂一二日中不見朕躬。焦煩。今朕亦不待此一二日矣。婚禮何煩。汝已夙備。我亦草草。卽今夕爲佳期矣。馬丹曰：此着何可草草。王曰：朕之命令即爲成憲。事前不令諸朝貴知之。待婚禮旣成。則坐觀諸臣。孰敢取罪東朝者。卿今且隨朕試之。朕今以人往巴黎。延大主教至此。試令彼輩觀之。能抗我否。馬丹曰：王決如是。宣勅耶。王曰：然。朕度爾心亦以速成爲。

上策卿聽之佳時不可再誤朕胡以獲此良策能禁止彼輩喋喋今且暫歸勿憎人耳目待再相見時則天長地久之誓成夫婦之基固矣王此時精神煥發憂鬱都消往來寢殿之中笑溢顏色遂掣小金鐘彭登立入王曰彭登此何時矣彭登曰近六旬鐘王少思卽曰汝知大尉德加鐵納安在彭登曰大尉已罷值適尙在離宮之外云將歸巴黎王曰今彼無人與之同往否彭登曰彼尙有友一人王曰朋友何狀得毋爲宿衛中人彭登曰非也似從美國來其人卽與大尉同居可十日彼蓋携此村人瞻仰皇居之壯麗王曰彼爲外國人則佳甚爾往召彼二人同至寢殿彭登曰臣且往觀不審其行與否遂出可十分鐘立入王曰如何彭登曰陛下殊有福臣至時彼二人方攀鞍欲上臣述旨彼二人咸戾宮門矣王曰安在彭登曰在門次候旨王曰入之汝在外守候不令一人入此卽丞相來亦少需不聽入待遣發此二人再取進止亞摩雷聞召初不謂異已聞並召格林則奇駭不可止防此草莽之臣苟失朝儀如何處者其在複室中則以小語訓廸格林語未竟彭登已宣旨令入格林者乃

不知王之所以然。前在美洲時以爲紐約之府尹。極人間之至貴者矣。今日忽聞私覲歐羅巴。第一大國之君王。旣駭且懼。其在配殿中觀殿宇之巍峨。帷幔之錦繡。衛士之威武。以爲是中之人必巍如天神矣。迨旣入殿。見一中年人。衣黑色之衣。身軀較已爲短。則四顧。覓王忽見其友鞠躬面此人始恍然悟其爲王。王曰大尉德嘉鐵納。汝晚來安。王語已微笑。曰若友爲異地人耶。顧格林曰外客。汝觀吾國較爾所居多風趣乎。格林亦曰陛下此地良佳。臣已見大城爲諸洲所渺見者。今日臣友引觀陛下宮殿。泉石輦路。眼福已飽。飫矣。明日遄歸可告臣。故老語之數年。尙不可盡。王曰汝爲坎拿大人。乃能操國語。如是之善。格林曰臣非坎拿大人。實英國屬地所產。王見格林壯大。天真爛然。無復拘檢。因思風忒諾克子爵所言。英人勇健。始信其真。因思彼間果人人如是。則兵力良不易。及然今日所謀。尙不及此。卽向大尉曰。汝今日爲朕以馬向巴黎。朕尚有事干爾。若友亦可同行。凡要事以二人將護。同行較一騎爲安。善惟汝行時。必以晚中。大尉曰如聖旨。王卽以延大主教事告大尉。尙曰此

數語。母論何人。汝皆勿對。且防後面有人隨爾。夏雷大主教所居。汝知之否。大尉曰。
知之。王曰。汝告大主教。以夜來在西北便門。以十二句鐘入宮。朕已以侍者候彼。且
告大主教。勿延。勿延。此事滋重要也。大尉鞠躬承旨。王曰。大尉汝佳。復顧格林曰。麥。
歇珍重。圖再相見。朕願爾小住法國。適其性命。因笑而摩其手。趣二人出殿。

偵探小說說

黃金

洋裝一冊

是書敍一英
國婦人冒認
前室姓氏冀
得遺產後知

洋裝一冊

敍醫生謀取
一富翁財先
酰殺其婦後
又扼殺富翁

洋裝一冊

秘魯受
中有一
之預

鐵錨

又扼殺富翁
適室中有一
竊者備見其
狀詣醫家詐
取重資醫又
放毒氣殺之
化其尸餘一
手後經偵者
察得蹤跡與
竊者之妻共
一手刺鐵鑄
詣醫家搜得
鑄其妻識爲
官罪人斯得

洋裝一冊

事犯家獲一
香囊見其眷
屬肫誠懇摯
心良不忍遂
一桶而後被
殺有某小說
及仇廉白二
人皆先收到
一桶而後被
殺有某小說
家及某偵探
百計調查未
得真犯及該
黨匿名書發
現其事乃白
罪人亦入獄

怪文筆明細

桶

定價二角

事犯家獲一
香囊見其眷
屬肫誠懇摯
心良不忍遂
慨然釋之自
投主教伏辜
乃國事犯之
眷屬亦自行
投到并陳述
法人某之義
主教皆

香囊

定價二角

屬之妹得
伉儷兒女
雄足稱

手錨

定價二角

屬之妹得
伉儷兒女
雄足稱

案

定價二角

屬之妹得
伉儷兒女
雄足稱

記

定價二角

屬之妹得
伉儷兒女
雄足稱

定價三
角

律師聲明案
遂破獲情節
尤奇幻可觀

定價二
角

手錨
鑄其妻識爲
官罪人斯得

定價二
角

怪文筆明細
罪人亦入獄
自經案情詭
其夫因訟之
鑄其妻識爲
官罪人斯得

定價二
角

屬之妹得
伉儷兒女
雄足稱